

儀

禮

集

釋

附釋宮一卷

九



儀禮集釋卷二十七

宋李如圭撰

特牲饋食禮

席于戶內

鄭注爲主人鋪之西面席自房來

主婦洗爵酌致爵于主人主人拜受爵主婦拜送爵

鄭注主婦拜于北面也今文曰主婦洗酌爵

宗婦贊豆如初主婦受設兩豆兩籩

鄭注初贊亞獻也主婦薦兩豆籩東面也

俎入設

鄭注佐食設之

主人左執爵祭薦宗人贊祭奠爵興取肺坐絕祭齊之興加于俎坐挽手祭酒啐酒

鄭注絕肺祭之者以離肺長也少儀曰牛羊之肺離而不提心豕亦然挽拭也挽手者為絕肺染汙也

肺不挽手

案判今注疏本作村

古文挽皆作說

釋曰村肺忖切之直取以祭離肺四面離割之不絕其中央少許時絕之以祭下記主人以下俎皆離肺

無扞肺

肝從左執爵取肝揆于鹽坐振祭齊之宗人受加于俎燔亦如之興席末坐卒爵拜

鄭注于席末坐卒爵敬也一酌而備再從而次之亦均

釋曰尸再獻而具肝從主人一酌而肝燔從與尸均坐振祭重出坐字疑

主婦荅拜受爵酌醋左執爵拜主人荅拜坐祭立飲卒爵拜主人荅拜主婦出反于房

釋曰主婦醋不更爵殺也

主人降洗酌致爵于主婦席于房中南面主婦拜受爵主人西面荅拜宗婦薦豆俎從獻皆如主人主人更爵酌醋卒爵降實爵于筐入復位

鄭注主人更爵自酢男子不承婦人爵也祭統曰夫婦相授受不相襲處酢必易爵明夫婦之別古文更

為受

案今注疏本訛作今文授為受

釋曰更爵更房內之爵也庭篚惟有二爵其一獻尸爵止其一主人致爵于主婦少牢下篇賓致爵于主

婦之俎亦佐食設之

三獻作止爵

鄭注賓也謂三獻者以事命之作起也舊說云賓入戶北面曰皇尸請舉爵

尸卒爵酢酌獻祝及佐食洗爵酌致于主人主婦燔從皆如初更爵酢于主人卒復位

鄭注洗乃致爵為異事新之燔從皆如初者如亞獻及主人主婦致爵也凡獻佐食皆無從其薦俎獻兄弟以齒設之賓更爵自酢亦不承婦人爵今文曰洗

致古文更為受

案今注疏本脫此十字

釋曰下記佐食旅旅齒于兄弟故其薦俎亦然賓三獻節中有十一爵獻尸一主婦致爵于主人二主婦自酢三主人致爵于主婦四主人自酢五尸卒爵酢賓六賓獻祝七獻佐食八賓致爵于主人九致爵于主婦十賓酢于主人十一

主人降阼階西面拜賓如初洗

鄭注拜賓而洗爵為將獻之如初如視濯時

案今注疏本視

上脫主人再拜賓答拜三拜眾賓眾賓答再拜者

如字

賓辭洗卒洗揖讓升酌西階上獻賓賓北面拜受爵主

人在右答拜

鄭注就賓拜者此禮不主于尊也賓卑則不專階主

人在右統于其位今文無洗

案今注疏本脫此四字

釋曰賓有司耳不得專階故主人就而獻之主人之

位在東

薦脯醢設折俎

鄭注凡節解者皆曰折俎不言其體略云折俎非貴體也上賓骼眾賓儀公有司設之

釋曰少牢下篇曰司士設賓俎羊骼衆賓其胥體儀也儀者儀度可用者用之

賓左執爵祭豆奠爵興取肺坐絕祭臍之興加于俎坐
挽手祭酒卒爵拜主人荅拜受爵酌酢奠爵拜賓荅拜
鄭注主人酌自酢者賓不敢敵主人主人達其意
主人坐祭卒爵拜賓荅拜揖執祭以降西面奠于其位
位如初薦俎從設

鄭注位如初復其位東面少牢饋食禮宰夫執薦以
從設于祭東司士執俎以從設于薦東是則皆公有

司爲之與

釋曰祭脯肺

衆賓升拜受爵坐祭立飲薦俎設于其位辯主人備荅
拜焉降實爵于筐

鄭注衆賓立飲賤不備禮鄉飲酒記曰立卒爵者不
拜旣爵備盞盞人之荅拜

釋曰坊記曰尸飲三衆賓飲一示民有上下也因其
酒肉聚其宗族以教民睦也

尊兩壺于阼階東加勺南枋西方亦如之

鄭注為酬賓及兄弟行神惠不酌上尊卑異之就其位尊之兩壺皆酒優之先尊東方示惠由近禮運曰澄酒在下

釋曰旅酬禮褻不敢與神靈共尊故就賓及兄弟之位尊之不用玄酒澄酒在下人君禮也按司尊彝四時之祭皆有鬯諸臣之所酢少牢饋食禮上下大夫堂下皆無尊者辟人君士卑不嫌與人君同

主人洗脾酌于西方之尊西階前北面酬賓賓在左鄭注先酌西方者尊賓之義

主人奠觶拜賓荅拜主人坐祭卒觶拜賓荅拜主人洗觶賓辭主人對卒洗酌西面賓北面拜

鄭注西面者鄉賓位立于西階之前賓所荅拜之東北

主人奠觶于薦北

鄭注奠酬于薦左非為其不舉行神惠不可同于飲酒

釋曰鄉飲酒記云凡奠者于左將舉于右

賓坐取觶還東面案此下各本衍拜字攷上經賓北面拜主人奠觶于薦北下云主人荅拜

荅賓北面之拜也賓坐取觶還東面下乃云主人荅拜賓奠觶于薦南賓方執觶在手不得拜明矣主人荅拜賓奠觶于薦南揖復位

鄭注還東面就其位薦西奠觶薦南明將舉

釋曰揖復位則奠觶時少南于位

主人洗爵獻長兄弟于阼階上如賓儀

鄭注酬賓乃獻長兄弟者獻之禮成于酬先成賓禮

此主人之義亦有薦胥設于位私人為之與

釋曰下記公有司獻次眾賓私臣獻次眾兄弟賓薦

俎蓋公有司設之兄弟薦俎蓋私臣設之

洗獻眾兄弟如眾賓儀

鄭注獻卑而必為之洗者顯神惠此言如眾賓儀則

知獻眾賓洗明矣

洗獻內兄弟于房中如獻眾兄弟之儀

鄭注內兄弟內賓宗婦也如眾兄弟如其拜受坐祭

立飲設薦俎于其位而立內賓其位在房中之尊北

案今注疏本脫其字不殊其長略婦人也有司徹曰主人洗獻

內賓于房中南面拜受爵

釋曰下記尊兩壺于房中西墉下內賓立于其北東

面南上宗婦北堂東面

主人西面荅拜更爵酢卒爵降實爵于篚入復位

鄭注爵辯乃自酢以初不殊其長也內賓之長亦南面荅拜

長兄弟洗觚爲加爵如初儀不及佐食洗致如初無從
鄭注大夫士三獻而禮成多之爲加也不及佐食無
從殺也致致于主人主婦

衆賓長爲加爵如初爵止

鄭注尸爵止者欲神惠之均于在庭

嗣舉奠盥入北面再拜稽首

鄭注嗣主人將爲後者舉猶飲也使嗣子飲奠者將
傳重累之者大夫之嗣子不舉奠辟諸侯

釋曰奠鉶南所奠觶也文王世子曰宗廟之中登餽
獻受爵則以上嗣上嗣君之適長子也以此禮言之
受爵謂嗣舉奠獻謂舉奠洗酌入餽謂宗人遣舉奠
盥祝命之餽也大夫之嗣無此禮辟君

尸執奠進受復位祭酒啐酒尸舉肝舉奠左執觶再拜
稽首進受肝復位坐食肝卒觶拜尸備荅拜焉

鄭注食肝受尊者賜不敢餘也備猶盡也每拜荅之以尊者與卑者為禮略其文耳古文備為復

釋曰肝醢尸所從獻者舉奠者嗣也以事名之

舉奠洗酌入尸拜受舉奠荅拜祭酒啐酒奠之舉奠出

復位

鄭注啐之者荅其欲酢已也奠之者復神之奠解嗣

齒于子姓凡非主人升降自西階

釋曰尸復神之奠解故惟啐之與接祭同時

兄弟弟子洗酌于東方之尊阼階前北面舉解于長兄

弟如主人酬賓儀

鄭注弟子後生也

宗人告祭胥

鄭注胥俎也所告者衆賓衆兄弟內賓也

案今注疏本兄弟上

脫一衆字獻時設薦俎于其位至此禮又殺告之祭使成

禮也其祭皆離肺不言祭豆可知

乃羞

鄭注羞庶羞也下尸載醢豆而已此所羞者自祝主

人至于內賓無內羞

釋曰少牢下篇乃有內羞此庶羞降于尸無臠炙少牢下篇曰羞及私人辯

賓坐取觶阼階前北面酬長兄弟長兄弟在右

鄭注薦南奠觶

釋曰主人酬賓之觶

賓奠觶拜長兄弟荅拜賓立卒觶酌于其尊東面立長兄弟拜受觶賓北面荅拜揖復位

鄭注其尊長兄弟尊也此受酬者拜亦北面

長兄弟西階前北面衆賓長自左受旅如初

鄭注旅行也受行酬也初賓酬長兄弟

長兄弟卒觶酌于其尊西面立受旅者拜受長兄弟北面荅拜揖復位

釋曰其尊西面之尊

衆賓及衆兄弟交錯以辯皆如初儀

鄭注交錯猶言東西

釋曰楚茨曰獻酬交錯禮儀卒度笑語卒獲古者于旅也語謂此時

爲加爵者作止爵如長兄弟之儀

鄭注于旅酬之間言作止爵明禮殺竝作

釋曰賓酬長兄弟長兄弟酬賓二觶繼舉至此禮殺

故不俟其畢而作止爵

長兄弟酬賓如賓酬兄弟之儀以辯卒受者實觶于篚

鄭注長兄弟酬賓亦坐取其奠觶此不言交錯以辯

賓之酬不言卒受者實觶于篚明其相報禮終于此

其文省

釋曰長兄弟亦取兄弟弟子所舉之觶酬賓以相報

故互文以見之

賓弟子及兄弟弟子洗各酌于其尊中庭北面西上舉

觶于其長奠觶拜長皆荅拜舉觶者祭卒觶拜長皆荅

拜舉觶者洗各酌于其尊復初位長皆拜舉觶者皆奠

觶于薦右

鄭注奠觶進奠之于薦右非神惠也今文曰奠于薦

右

長皆執以興舉觶者皆復位荅拜長皆奠觶于其所皆

揖其弟子弟子皆復其位

鄭注復其位者東西面位弟子舉觶于其長所以序

長幼教孝弟凡堂下拜亦皆北面戰于其對也
爵皆無算

鄭注算數也賓取觶酬兄弟之黨長兄弟取觶酬賓
之黨惟己所欲亦交錯以辯無次第之數因今接會
使之交恩定好優勸之

利洗散獻于尸酢及祝如初儀降實散于篚

鄭注利佐食也言利以今進酒也更言獻者以利侍
尸禮將終宜一進酒嫌于加酒亦當三也不致爵禮
又殺也

主人出立于戶外西面

鄭注事尸禮畢

祝東面告利成

鄭注利猶養也供養之禮成不言禮畢于尸閒之嫌
尸謾祝前主人降

鄭注謾起也前猶導也少牢饋食禮曰祝入口謾主
人降立于阼階東西面祝先尸從遂出于庭門前尸
之儀士虞禮備矣

釋曰楚茨曰孝孫徂位工祝致告神具醉止皇尸載

起致告告利成也

祝反及主人入復位命佐食徹尸俎俎出于席門

鄭注俎所載于所俎少牢饋食禮曰有司受歸之

徹庶羞設于西序下

鄭注為將餽去之庶羞主為尸非神饌也尚書傳曰

宗室有事族人皆侍終日大宗已侍于賓奠然後燕

私燕私者何也祭已而與族人飲也

案今注疏本脫祭字此徹

庶羞置西序下者為將以燕飲與然則自尸祝至于

兄弟之庶羞宗子以與族人燕飲于堂內賓宗婦之

庶羞主婦以燕飲于房

釋曰楚茨曰諸宰君婦廢徹不遲諸父兄弟備言燕

私

筵對席佐食分簋鉶

鄭注為將餽分之也分簋者分敦黍于會為有對也

敦有虞氏之器也周制士用之變敦言簋容同姓之

士得從周制耳祭統曰餽者祭之末也不可不知也

是故古之人有言曰善終者如始餽其是已是故古

之君子曰尸亦餽鬼神之餘

案此下今注疏本有也字惠術也可

以觀政矣

宗人遣舉奠及長兄弟盥立于西階下東面北上祝命嘗食養者舉奠許諾升入東面長兄弟對之皆坐佐食授舉各一膚

鄭注命告也士使嗣子及兄弟養其惠不過族親也

案今注疏本脫也字古文養皆作餽

釋曰養者舉膚降于尸也祭統曰尸諤君與卿四人餽君起大夫六人餽大夫起士八人餽少牢饋食禮二佐食及二賓長餽

主人西面再拜祝曰養有以也兩養奠舉于俎許諾皆答拜

鄭注以讀如何其久也必有以也之以祝曰養

疏本訛作告釋辭以戒之言女養乎此

養以也以先祖有德而享于此祭其坐養其餘亦當以卒之也少牢饋食禮不戒者非親昵也舊說曰主人拜

下養席南

若是者三

鄭注丁寧戒之

皆取舉祭食祭舉乃食祭鉶食舉

鄭注食乃祭鉶禮殺

釋曰食簋實也尸祭鉶嘗之乃爾黍

卒食主人降洗爵宰贊一爵主人升酌酌上養上養拜

受爵主人荅拜酌下養亦如之

鄭注少牢饋食禮曰贊者洗三爵酌案今注疏本脫酌字主人

受于戶內以授次養舊說云主人北面授下養爵

主人拜祝曰酌有與也如初儀

鄭注主人復拜為戒也與讀如諸侯以禮相與之與

言女酌此當有所與也與者與兄弟也既知似先祖

之德亦當與女兄弟謂教化之

兩養執爵拜

鄭注荅主人也

祭酒卒爵拜主人荅拜兩養皆降實爵于篚止養洗爵

升酌酢主人主人拜受爵

鄭注下養復兄弟位不復升也

上養卽位坐荅拜

鄭注既授爵戶內乃就坐

主人坐祭卒爵拜上饗荅拜受爵降實于篚主人出立于戶外西面

鄭注事餒者禮畢

祝命徹俎豆籩設于東序下

鄭注命命佐食俎主人之俎宗婦不徹豆籩徹禮略各有為而已設于東序下亦將燕也

祝執其俎以出東面于戶西

鄭注俟告利成少牢下篇曰祝告利成乃執俎以出宗婦徹祝豆籩入于房徹主婦薦俎

鄭注宗婦既竝徹徹其卑者士虞禮曰祝薦席徹入于房

佐食徹尸薦俎敦設于西北隅几在南非用筵納一尊佐食闔墉戶降

鄭注非隱也不知神之所在或諸遠人乎尸謾而改饌為幽闇庶其饗之所以為厭飫少牢饋食禮曰南面如饋之設此所謂當室之白陽厭也則尸未入之前為陰厭矣曾子問曰殤不備祭何謂陰厭陽厭也

案今注疏本謂訛作為

釋曰釋宮曰西南隅謂之奧西北隅謂之屋漏郭璞曰奧者室中隱奧之處孫炎曰屋漏者當室之白日光所漏入也厭者無尸直厭飫神尸未入饌于奧故曰陰厭匪謂以席為障隱也祭時匪西北隅因謂西北隅為匪喪大記曰取西北匪薪

祝告利成降出主人降卽位宗人告事畢賓出主人送于門外再拜

鄭注拜送賓也凡去者不答拜

佐食徹阼俎堂下俎畢出

鄭注記俎出節兄弟及眾賓自徹而出惟賓俎有司

徹歸之尊賓也

案也今注疏本訛作者

釋曰賓出主人拜送明賓不自徹也曲禮曰凡祭于

公者必自徹其俎

記 特牲饋食其服皆朝服玄冠緇帶緇鞞

鄭注于祭服此也皆者謂賓及兄弟筮日筮尸視濯亦玄端至祭而朝服朝服者諸侯之臣與其君日視朝之服大夫以祭今賓兄弟緣孝子欲得嘉賓尊客以事其祖禰故服之緇鞞者下大夫之臣夙興主人

服如初則固立端
之儻釋曰凡朝服素鞵

惟尸祝佐食立端立裳黃裳雜裳可也皆爵鞵

鄭注與主人同服周禮士之齊服有立端素端然則

立裳上士也黃裳中士雜裳下士

釋曰可者惟其所當服服之

設洗南北以堂深東西當東榮

鄭注榮屋翼也

水在洗東

鄭注祖天地之左海
案左今注疏本訛作右

筐在洗西南順實二爵二觚四觶一角一散

鄭注順從也言南從統于堂也二爵者為賓獻爵止

主婦當致也二觚長兄弟及眾賓長為加爵二人班

同宜接竝也
案宜今注疏本作迎四觶一酌奠其三長兄弟酬

賓卒受者與賓弟子兄弟弟子舉觶于其長禮殺事

相接禮器曰貴者獻以爵賤者獻以散尊者舉觶卑

者舉角舊說云爵一升觚二升觶三升角四升散五

升

釋曰賓獻尸之爵止主人當致爵于主婦故爵二長兄弟與眾賓長班同接竝為加爵宜各用一觚故觚二長兄弟酬賓之觶未奠于筐賓弟子及兄弟弟子已各舉觶于其長其一觶酌奠于鉶南故觶四壺於禁饌于東序南順覆兩壺焉蓋在南明日卒奠冪用綌卽位而徹之加勺

鄭注覆壺者盥瀝水且為其不宜塵冪用綌以其堅絜禁言於者祭尚厭飫得與大夫同器不為神戒也釋曰卒奠酌奠奠于鉶南時卽位尸卽席坐時鄉飲

酒賓至徹冪禮器曰禮有以下為貴者天子諸侯之尊廢禁大夫士於禁玉藻曰大夫側尊用於士側尊用禁於無足禁有足士卑故以禁戒為稱於又曰斯禁鄉飲酒鄉射雖大夫以非祭禮猶曰斯禁至祭乃名曰於士祭禮言於禁得與大夫同名

籩中以綌也纁裏棗烝栗擇

鄭注籩有巾者果實之物多皮核優尊者可烝裏之也烝擇互文舊說云纁裏者皆立被

釋曰聘禮竹籩

此下原本缺

銅荖用苦若薇皆有滑夏葵冬菹

鄭注苦苦茶也菹菹屬乾之冬滑于葵詩云周原膾

膾菹茶如飴今文苦為芾芾乃地黃非也

釋曰內則曰菹菹以滑之

棘心匕刻

鄭注刻若今龍頭

釋曰詩大東曰有掾棘匕

牲爨在庖門外東南魚腊爨在其南皆西面饔爨在西

壁

鄭注饔炊也西壁堂之西牆下舊說云南北直屋栢

稷在南

斫俎心舌皆去本末午割之實于牲鼎載心立舌縮俎

鄭注午割從橫割之亦勿沒立縮順其性心舌知食

味者欲尸之饗此祭是以進之

釋曰一從一橫曰午四面皆鄉中割之

賓與長兄弟之薦自東房其餘在東堂

鄭注東堂東夾之前近南

沃尸盥者一人奉槃者東面執匱者西面淳沃執巾者

在匱北背一人奉饗齊東面饗西面饗中背
鄭注匱北執匱之北亦西面每事各一人淳沃稍注
齊之今文淳作激自東其齊亦東堂

宗人東面取巾振之三南面授尸卒執巾者受

鄭注宗人代授巾庭長尊

尸入主人及賓皆辟位出亦如之

鄭注辟位遠遁

嗣舉奠佐食設豆鹽

鄭注用宜鹽也

佐食當事則戶外南面無事則中庭北面

鄭注當事將有事而未至

凡祝呼佐食許諾

鄭注呼猶命也

宗人獻與旅齒于眾賓

鄭注尊庭長齒從其長幼之次

佐食于旅齒于兄弟

釋曰祭統曰凡賜爵昭為一穆為一昭與昭齒穆與

穆齒及羣兄弟

尊兩壺于房中西墉下南上

鄭注為婦人旅也其尊之節亞西方

釋曰尊壺于西方已乃尊于房

內賓立于其北東面南上宗婦北堂東面北上

鄭注二者所謂內弟兄內賓姑姊妹也宗婦族人之

婦其夫屬于所祭為子孫或南上或北上宗婦宜統

于主婦主婦南面北堂中房而北

主婦及內賓宗婦亦旅西面

鄭注西面者異于獻也男子獻于堂上旅于堂下婦

人獻于南面旅于西面內賓象眾賓宗婦象兄弟其

節與其儀依男子也主婦酬內賓之長酌奠于薦左

內賓之長坐取奠于右宗婦之娣婦舉觶于其娣婦

亦如之內賓之長坐取奠觶酬宗婦之娣交錯以辯

宗婦之娣亦取奠觶酬內賓之長交錯以辯內賓之

少者宗婦之娣婦各舉觶于其長並行交錯無算其

拜及飲者皆西面于主婦之東南

案今注疏本脫于字

宗婦贊薦者執以坐于戶外授主婦尸卒食而祭饔爨

雍爨

鄭注雍孰肉以尸享祭竈有功也舊說云宗婦祭饔
爨亨者祭雍爨用黍肉而已無籩豆俎禮器曰燔爨
于爨夫爨者老婦之祭盛于盆尊于瓶

賓從尸俎出席門乃反位

鄭注賓從尸送尸也士之助祭終其事也俎尸俎也
賓既送尸復入反位者宜與主人為禮乃去之

尸俎右肩臂臠肫脰正脊二骨橫脊長脊二骨短脊

鄭注尸俎神俎也士之正祭禮九體貶于大夫有併
骨二亦得十一之名合少牢之體數此所謂放而不

致者凡俎實之數奇脊無中脊無前貶于尊者不貶
正脊不奪正也正脊二骨長脊二骨者將舉于尸尸
食未飽不欲空神俎

釋曰尸餽鬼神之餘故謂神俎為尸俎也尸先舉正
脊次舉長脊故皆二骨少牢饋食禮又有脰脊代脊
為十一體主人主人不舉祭於尸

膚三

鄭注為養用二厭飫一也

離肺一

鄭注離猶搯也小而長午割之亦不提心謂之舉肺
刊肺三

鄭注為尸主人主婦祭今文刊為切

釋曰尸酢主人主人不絕祭知用尸俎之刊肺

魚十有五

鄭注魚水物以頭枚數陰中之物取數于月十有五

日而盈少牢饋食禮亦云十有五而俎尊卑同此所

謂經而等也

腊如牲骨

鄭注不但言體以有一骨二骨者
祝俎髀脰脊二骨脅二骨

鄭注凡接于神及尸者俎不過牲三體以特牲約加

其可併者二亦得奇名少牢饋食禮羊豕各三體

釋曰脅蓋代脅也與脰脊皆尸俎所不備者

膚一離肺一胙俎臂正脊一骨橫脊長脅二骨短脅

鄭注主人尊欲其體得祝之加數五體又加其可併

者二亦得奇名臂左體臂

膚一離肺一主婦俎殼折

鄭注殼後足折分後右足以為佐食俎不分左臠折
辟大夫妻古文殼皆作穀案今注疏本脫此六字

其餘如昨俎

鄭注餘謂脊脅膚肺

佐食俎殼折脊脅

鄭注三體卑者從正

釋曰無加骨也脊脅不名無定體

膚一離肺一賓骼長兄弟及宗人折其餘如佐食俎

鄭注骼左骼也賓俎全體尊賓不用尊體為其已甚

卑而全之其宜可也長兄弟及宗人折不言所分略
之

釋曰祝佐食接神賓三獻長兄弟為加爵宗人庭長

授巾皆接口而祝為尊故祝五體而餘皆三體眾賓

長亦為加爵接于尸蓋亦三體下文惟眾賓殺脅耳

眾賓及眾兄弟內賓宗婦若有公有司私臣皆殺脅

鄭注又畧此所折骨直破折餘體可殺者升之俎一

而已不備三者賤祭禮接神者貴凡骨有肉曰殺祭

統曰凡為俎者以骨為主貴者取貴骨賤者取賤骨

貴者不重賤者不虛示均也俎者所以明惠之必均也案今注疏本脫明字善為政者如此故曰見政事之均焉公

有司亦士之屬命于君者也私臣自己所辟除者

釋曰禮器曰羔豚而祭百官皆足大牢而祭不必有餘此之謂稱百官謂眾助祭者

膚一離肺一公有司門西北面東上獻次眾賓私臣門東北面西上獻次兄弟升受降飲

鄭注獻在後者賤也祭祀有上事者貴之非執事者亦皆與旅

釋曰擇公有可以為賓為眾賓位西階下執祭事其不執事者則在門西兄弟雖無上事亦在堂下西面族親故也宗人獻與旅齒于眾賓則公有司為之佐食齒于兄弟其選于私臣與公有司私臣薦俎蓋徒隸為之

日用丁己

鄭注內事用柔日必丁己者取其令名自丁寧自變
改皆爲謹敬必先諏此日明日乃筮

筮旬有一日

鄭注旬十日也以先月下旬之己筮來月上旬之己
筮于廟門之外主人朝服西面于門東史朝服左執筮
右抽上韝兼與筮執之東面受命于主人

鄭注史家臣主筮事者

釋曰主人朝服者服祭服以筮也特牲筮日主人亦

服祭時玄端司服職曰享先王則衮冕祭義曰易抱
龜南面天子衮冕北面則天子卜祭亦服其祭服雜
記大夫士筮宅史練冠長衣以筮筮著也

主人曰孝孫某來日丁亥用薦歲事于皇祖伯某以某
妃配某氏尚饗

鄭注丁未必亥也直舉一日以言之耳禘于大廟禮
曰日用丁亥不得丁亥則己亥辛亥亦用之無則苟
有亥焉可也薦進也進歲時之祭事也皇君也伯某
且字也大夫或因字爲諡春秋傳曰魯無駭卒請諡

與族公命以字為展氏是也其仲叔季亦曰仲某叔某季某也某妃某妻也合食曰配某氏若言姜氏子氏也尚庶幾饗歆也

釋曰夏小正曰丁亥萬用入學

案原本訛作萬入大學據大戴禮記改正

丁亥者吉日也筮不同士禮贊命者蓋辟君

史曰諾西面于門西抽下韉左執筮右兼執韉以擊筮

鄭注將問吉凶焉故擊之以動其神易曰著之德圓

而神

遂述命曰假爾大筮有常孝孫某來日丁亥用薦歲事

于臯祖伯某以某妃配某氏尚饗

鄭注述循也重以主人辭告筮也假借也言因著之

靈以問之常吉凶之占繇

乃釋韉立筮

鄭注卿大夫之著長五尺立筮由便

卦者在左坐卦以木卒筮乃書卦于木示主人乃退占

鄭注卦者史之屬也卦以木者每一爻畫地以識之

六爻備書于板史受以示主人退占東面旅占之

釋曰示主人石本上有以字

吉則史鞞筮史兼執筮與卦以告于主人占曰從

鄭注從者求吉得吉之言主人厭古東而厭古之

乃官戒宗人命滌宰命為酒乃退

鄭注官戒戒諸官也當共祭祀事者使之具其物且

齊也滌漑濯祭器掃除宗席

若不吉則及遠日又筮日如初

鄭注及至也遠日後丁若後己

宿

鄭注宿讀為肅肅進也大夫尊儀益多筮日既戒諸

官以齊戒矣

案矣今注疏本訛作也

至前祭一日又戒以進之

使知祭日當來古文宿皆作羞

釋曰申戒為宿宿諸官宜在宿尸之後宿尸之夕為

期則宿前于祭一日

前宿一日宿戒尸

鄭注皆肅諸官之日又先肅尸者重所用為尸者又

為將筮

明日朝筮尸如筮日之儀

案儀唐石經及京本皆作禮從今注疏本

命曰孝

孫某來日丁亥用薦歲事于皇祖伯某以某妃配某氏

以某之某為尸尚饗筮卦占如初

鄭注某之某者字尸父而名尸也字尸父尊鬼神也
不前期三日筮尸者大夫下人君祭之朝乃視灌與
士異

釋曰周禮大宰享先王則掌百官之誓戒前期十日
帥執事而下日遂戒祭統曰散齋七日以定之致齋
三日以齊之先期旬有一日宮宰宿夫人夫人亦散
齋七日致齋三日則天子諸侯前祭十日卜日而戒
諸官散齋前期三日致齋士卑亦前期三日筮尸不

嫌與人君同惟不得散齋七日耳大夫不敢同君散
齋九日前祭一日乃筮尸而致齋

吉則乃遂宿尸祝擯

鄭注筮吉又遂肅尸重尸也既肅尸乃肅諸官及執
事者祝為擯者尸神象

主人再拜稽首祝告曰孝孫某來日丁亥用薦歲事于
皇祖伯某以某妃配某氏敢宿

鄭注告尸以主人為此事來肅

案今注疏本脫肅字

尸拜許諾主人又再拜稽首主人退尸送揖不拜

鄭注尸不拜者尸尊

釋曰祝釋辭尸乃拜異于士

若不吉則遂改筮尸

鄭注即改筮之不及遠日

既宿尸反為期于庭門之外

鄭注為期肅諸官而皆至定祭早晏之期為期亦夕

時也言既肅尸反為期明大夫尊肅尸而已其為賓

及執事者使人肅之

釋曰特牲饋食禮親宿賓

主人門東南面宗人朝服北面曰請祭期主人曰比于

子

鄭注此次早晏在于子也主人不西面者大夫尊于

諸官有君道也為期亦惟尸不來也

宗人曰旦明行事主人曰諾乃退

鄭注旦明旦日質明

釋曰周禮雞人凡國事為期則告之時時謂此旦明

之時

明日主人朝服即位于庭門之外東方南面宰宗人西

面北上牲北首東上司馬判羊司士擊豕宗人告備乃退

鄭注判擊皆謂殺之此實既省告備乃殺之文互者

省也

案今注疏本

尚書傳曰

案今注疏本脫曰字

羊屬火豕屬

水

雍人概鼎七俎于雍爨雍爨在門東南北上

鄭注雍人掌割烹之事者爨竈也在門東南統于主

人北上羊豕魚腊皆有竈竈西有鑊凡概者皆陳之

而後告絜

廩人概餽廩匕與敦于廩爨廩爨在雍爨之北

鄭注廩人掌米入之藏者廩如餽一孔匕所以匕黍

稷者也古文餽為烝

釋曰廩無底餽也

司宮概豆籩勺爵觚觶几洗篚于東堂下勺爵觚觶實

于篚卒概饌豆籩與篚于房中放于西方設洗于阼階

東南當東榮

鄭注放猶依也大夫攝官司宮兼掌祭器也

羹定雍人陳鼎五三鼎在羊鑊之西二鼎在豕鑊之西

鄭注魚腊從羊膚從豕統于牲西二鼎豕不統之西
 司馬升羊右胖髀不升肩臂臑膊胙正脊一脰脊一橫
 脊一短脅一正脅一代脅一皆二骨以竝腸三胃三舉
 肺一祭肺三實于一鼎于氣中效于西次適於午時
 鄭注升猶上也上右胖周所貴也髀不升近竅賤也
 肩臂臑肱骨膊胙股骨脊從前為正脅旁中為正脊
 先前脅先後屈而反猶器之絰也竝併也脊脅骨多
 六體各取二骨併之以多為貴舉肺一尸食所先舉
 也祭肺三為尸主入主婦古文胖皆作辯髀皆作脾

今文竝皆為併

釋曰肩至代脅凡十一體脊脅言一見其體言二以

竝見其骨腸胃各三蓋取脊脅之數尸主人主婦各

取神

案此下原本缺

司士升豕右胖髀不升肩臂臑膊胙正脊一脰脊一橫
 脊一短脅一正脅一代脅一皆二骨以竝舉肺一祭肺
 三實于一鼎

鄭注豕無腸胃君子不食囷腴

釋曰養牛羊曰芻犬豕曰豢豢亦作囷犬豕食米穀

腸胃有似人穢

大不曰穢穢亦於因大不食米

雍人倫膚九實于一鼎

不食困則

鄭注倫擇也膚脅革肉擇之取美者

釋曰膚豕肉也

一升豕一豕二骨以豕與一豕

司士又升魚腊魚十有五而鼎腊

純而鼎腊用麋

鄭注司士又升副倅者合升左右胖曰純純猶全也

釋曰升鼎同時下經云司士三人升魚腊膚

主獻各

卒胥皆設扃鼎乃舉陳鼎于庭門之外東方北面上

鄭注北面北上鄉內相隨古文鼎皆為密

司宮尊兩甒于房戶之間同於皆有冪

冪各本訛作冪據唐石經改

正甒有玄酒

鄭注房戶之間房西室戶東也於無足禁者酒戒也

大夫去足改名優尊者若不為之戒然古文甒皆作

庶今文冪作冪

司宮設鬯水于洗東有料設筐于洗西南肆

鄭注料鬯水器也凡設水用鬯沃盥用料禮在此也

改饌豆籩于房中南面如饋之設實豆籩之實

鄭注改更也為實之更之威儀多也如饋之設如其

陳之左右也饋設東面

釋曰如設于奧時

小祝設槃匱與篚巾于西階東

鄭注為尸將盥

主人朝服即位于阼階東西面

鄭注為將祭也

司宮筵于奧祝設几于筵上右之

鄭注布陳神坐也室中西南隅謂之奧席東面近南

為右

主人出迎鼎除冪士盥舉鼎主人先入

鄭注道之也主人不盥不舉

司宮取二勺于篚洗之兼執以升乃啓二尊之蓋冪奠

于楸上加二勺于二尊覆之南柄

鄭注二尊兩甒也今文啓為開古文柄皆為枅

案今注疏

本脫啓為開古文皆共六字

釋曰立酒亦有勺重古如酌者然

鼎序入雍正執一匕以從雍府執四匕以從司士合執

二俎以從司士贊者二人皆合執二俎以相從入

鄭注相助

釋曰雍正雍官之長府其屬也鼎一七二俎正俎五

與所俎而六

陳鼎于東方當序南于洗西皆西面北上膚爲下匕皆

加于鼎東枋

鄭注膚爲下以其加也南于洗西陳于洗西南

釋曰榮在序外鼎當序洗當榮膚升鼎先魚腊從其

牲陳之在下如其次

俎皆設于鼎西西肆所俎在羊俎之北亦西肆

鄭注所俎在北將先載也異其設文不當鼎

釋曰所俎不言在羊鼎西知不當鼎

宗人遣賓就主人皆盥于洗長杙

鄭注長杙者長賓先次賓後也主人不杙言就主人

者明親臨之古文杙作匕

釋曰此臣也而曰賓者祭以得賓客之助爲榮也禮

運曰仲尼與于蜡賓

佐食上利升牢心舌載于所俎心皆安下切上牛割勿

沒其載于所俎未在上舌皆切本末亦午割勿沒其載

于所橫之皆如初為之于爨也

鄭注牢羊豕也安平也平割其下于載便也凡割本

末食必正也午割使可絕也

案今注疏本脫也字

勿沒為其分

散也所之為言敬也所以敬尸也周禮祭尚肺事尸

尚心舌心舌知滋味今文切皆為刲

釋曰凡言牢者羊豕具有也午割從橫割之勿沒不

絕其中央少許在爨制之已然特牲饋食禮曰所俎

心舌皆去本末午割之實于牲鼎載心立舌縮俎論

語曰割不正不食

佐食遷所俎于阼階西西縮乃反佐食二人上利升羊

載右胖髀不升肩臂臑膊骼正脊一脰脊一橫脊一短

脊一正脊一代脊一皆二骨以並腸三胃三長皆及俎

拒舉肺一長終肺祭肺三皆切肩臂臑膊骼在兩端脊

脊肺肩在上

鄭注升之以尊卑載之以體次各有宜也拒讀為介

距之距俎距脛中當橫節也凡牲體之數及載備于

此

釋曰俎距謂中俎足為橫距猶雞距也凡牲體前脛

骨三肩臂膈也後脛骨三膊骼也脊骨三正脊脰

脊橫脊也脅骨三代脅長脅短脣也膊之

案此下原本缺

下利升豕其載如羊無腸胃體其載于俎皆進下

鄭注進下變于食生也所以交于神明下敢以食道

敬之至也鄉飲酒禮進脰羊次其體豕言進下互相

見

釋曰骨有本末進脰進本也進下進末也

司士三人升魚腊膚魚用鮒十有五而俎縮載右首進

腍

鄭注右首進腍亦變于食生也有司載魚橫之少儀

曰羞濡魚者進尾

釋曰凡載魚皆右首食生則寢右而進鬻下篇賓尸

魚橫于人為縮蓋進其尾也又與此正祭異

腊一純而俎亦進下肩在上

鄭注如羊豕凡腊之體載禮在此

膚九而俎亦橫載革順

鄭注列載于俎令其皮相順亦者亦其骨體

釋曰牲體進下則俎亦橫載于此互見之

卒胥祝盥于洗升自西階主人盥升自阼階祝先入南面主人從戶內西面

鄭注將納祭也

主婦被錫衣侈袂薦自東房韭菹醢醢坐奠于筵前主婦贊者一人亦被錫衣侈袂執葵菹羸醢以授主婦主婦不興遂受陪設于東韭菹在南葵菹在北主婦興入于房

鄭注被錫讀爲髮髣古者或剔髮者刑者之髮以被婦人之紒爲飾因名髮髣焉此周禮所謂次也不纒

笄者大夫妻尊亦衣綃衣而侈其袂耳侈者蓋半士妻之袂以益之衣三尺三寸袪尺八寸韭菹醢醢朝事之豆也而饋食用之豐大夫禮葵菹在北紒今文錫爲錫羸爲蝸

釋曰追師有次次第髮之長短爲之亦見士昏禮婦贊者一人亦被錫衣侈袂則其餘如士之妻纒笄宵衣耳士妻與助祭婦人同宵衣無異服者禮窮則同故也袂袖也袪袂口也士妻之袂二尺二寸袪尺二寸朝事薦血腥之事也周禮醢人朝事八豆有韭菹

醢醢饋食八豆有葵菹羸醢士饋食禮惟取葵菹羸醢豐大夫禮故兼取朝事二豆豆皆右菹左醢而此葵菹在北者與韭菹淨設之采蘋詩曰于以奠之宗室牖下王肅以爲大夫妻助祭采蘋藻以爲菹設之于奧奧卽牖下朝士當作朝事

佐食上利執羊俎下利執豕俎司士三人執魚腊膚俎序升自西階相從入設俎羊在豆東豕亞其北魚在羊東腊在豕東特膚當俎北端

鄭注相助也

主婦自東房執一金敦黍有蓋坐設于羊俎之南婦贊者執敦稷以授主婦主婦興受坐設于魚俎南又興受贊者敦黍坐設于稷南又興受贊者敦稷坐設于黍南敦皆南首主婦興入于房

鄭注敦有首者尊者器飾也飾蓋象龜周之禮飾器各以其類龜有上下甲今文曰主婦入于房

祝酌奠遂命佐食啓會佐食啓會蓋二以重設于敦南鄭注酌奠酌酒爲神奠之後酌者酒尊要成也特牲饋食禮曰祝洗酌奠奠于鉶南重累之

釋曰饌由尊者而成故酒後設之下經鉶設于韭菹之南此時鉶未設故奠處亦空其文
主人西面祝在左主人再拜稽首祝曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尚饗主人又再拜稽首
鄭注羊曰柔毛豕曰剛鬣嘉薦菹醢也普淖黍稷也普大也淖和也德能大和乃有黍稷春秋傳曰奉粢以告曰絜粢豐盛謂其三時不害而民和年豐也
釋曰曾子問曰宗子爲士庶子爲大夫其祭也如之

何孔子曰以上牲祭于宗子之家祝曰孝子某爲介子某薦其常事若宗子有罪居于他國庶子爲大夫其祭也祝曰孝子某使介子某執其常事羊肥則毛柔豕肥則鬣剛盛音成

祝出迎尸于廟門之外主人降立于阼階東西面祝先入門右尸入門左

鄭注主人不出迎尸伸尊也特牲饋食禮曰尸入主人及賓皆辟位出亦如之祝入門右者辟尸盥也既則後尸

釋曰不迎尸伸尸之尊

宗人奉槃東面于庭南一宗人奉匱水西面于槃東一宗人奉簞巾南面于槃北乃沃尸盥于槃上卒盥坐奠簞取巾興振之三以授尸坐取簞興以受尸巾

鄭注庭南沒霤

釋曰尸盥設于西階東尸入門左至門內霤侍盥者奉器就之門內霤在庭之南特牲饋食禮曰尸入門左北面盥亦繼門言之

祝延尸尸升自西階入祝從

鄭注由後詔相之曰延延進也周禮曰大祝相尸禮

祝從從尸升自西階

主人升自阼階祝先入主人從

鄭注祝接神先入宜也

尸升筵祝主人西面立于戶內祝在左

鄭注主人由祝後而居右尊也祝從尸尸即席乃卻

居主人左

祝主人皆拜妥尸尸不言尸荅拜遂坐

鄭注拜妥尸拜之使安坐也尸自此荅拜遂坐而卒

食其間有不啐奠不嘗鉶不告旨大夫之禮尸彌尊

也不告旨者為初亦不饗所謂曲而殺

釋曰

不嘗鉶不嘗豕鉶也不饗祝不釋勸強之辭蓋

辟人君祝反南面主人西面立于其內

鄭注未有事也隋祭爾敦

案隋各本訛作墮下同據釋文改正官各肅

主其職不命

尸取韭菹辯揆于三豆祭于豆間上佐食取黍稷于四

敦下佐食取牢一切肺于俎以授上佐食上佐食兼與

黍以授尸尸受同祭于豆祭

鄭注牢羊豕也同合也合祭于俎豆之祭也黍稷之

祭為隋祭將食神餘尊之而祭之今文辯為徧

釋曰切肺祭肺也神俎祭肺二取其一也言牢者羊

豕兼取之俎豆當作菹豆

上佐食舉尸牢肺正脊以授尸上佐食爾上敦黍于筵

上右之

鄭注爾近也或曰移也右之便尸食也重言上佐食

明更起不相因

釋曰牢肺離肺也授尸下賈氏有尸受祭肺四字不

設大羹者大羹為尸不為神賓尸乃有之

主人羞所俎升自阼階直于膚北

案直各本訛作置據釋文改正

鄭注羞進也所敬也親進之主人敬尸之加黍于

上佐食羞兩鉶取一羊鉶于房中坐設于韭菹之南下

佐食又取一豕鉶于房中以從上佐食受坐設于羊鉶

之南皆芼皆有柶尸扱以柶祭羊鉶遂以祭豕鉶嘗羊

鉶

鄭注芼菜也羊用苦豕用薇皆有滑

釋曰苦薇滑見公食記

食舉

鄭注舉牢肺正脊也先食啗之以為道也

三飯

鄭注食以黍

釋曰飯扶晚切下同

上佐食舉尸牢幹尸受振祭嚼之佐食受加于所

鄭注幹正脊也古文幹為肝

上佐食羞載兩瓦豆有醢亦用瓦豆設于薦豆之北

侑

鄭注侑勸也祝獨勸者更則尸飽實猶飽也祝既侑復反南面

所

尸又食上佐食舉尸牢肩尸受振祭嚌之佐食受加于所
鄭注四舉牢體始于正脊終于肩尊于終始
尸不飯告飽祝西面于主人之南

鄭注祝當贊主人辭

主人不言拜侑

鄭注祝言而不拜主人不言而拜親疏之宜
釋曰周禮大祝辨九拜以享侑祭祀

尸又三飯

鄭注為祝一飯為主人三飯尊卑之差凡十一飯凡

今注疏本下人君也

詐作尸
釋曰下尸稼切

上佐食受尸牢肺正脊加于所
鄭注言受者尸授之也尸受牢幹而實舉于菹豆食
畢操以授佐食焉豆

釋曰菹豆非菹之豆

主人降洗爵升北面酌酒乃酌尸尸拜受主人拜送

鄭注酌猶羨也既食之而又飲之所以樂之古文酌

作酌

尸祭酒啐酒賓長羞牢肝用俎縮執俎肝亦縮進末鹽

在右

鄭注羞進也縮從也鹽在肝右便尸換之古文縮為

蹙

釋曰鹽在右據賓長西面設者而言于尸為鹽在左

右取肝鄉左換之

尸左執爵右兼取肝換于俎鹽振祭嚼之加于菹豆卒

爵主人拜祝受尸爵尸荅拜

鄭注兼兼羊豕

釋曰少儀曰其有折俎者取祭反之不坐燔亦如之

尸則坐

祝酌授尸尸醋主人主人拜受爵尸荅拜主人西面奠

爵又拜

鄭注主人受酢酒俠爵拜彌尊尸

上佐食取四敦黍稷下佐食取牢一切肺以授上佐食上佐食以綏祭

鄭注綏或作接接讀為墮將受嘏亦尊尸餘而祭之

古文綏為𠄎案綏各本訛作墮據經云以綏祭又後注云綏亦當作接古文為𠄎可證此墮

字乃綏之訛

主人左執爵右受佐食坐祭之又祭酒不興遂啐酒

鄭注右受佐食右手受墮于佐食也至此言坐祭之

者明尸與主人為禮也尸恒坐有事則起主人恒立

有事則坐

祝與二佐食皆出盥于洗入二佐食各取黍于一敦上

佐食兼受搏之以授尸尸執以命祝

鄭注命祝以嘏辭

卒命祝祝受以東北面于尸西以嘏于主人曰皇尸命

工祝承致多福無疆于女孝孫來女孝孫使女受祿于

天宜稼于田眉壽萬年勿替引之

鄭注嘏大也予主人以大福工官也承猶傳也來讀

曰釐釐賜也耕種曰稼勿猶無也替廢也引長也言

無廢止時長如是也古文嘏為格祿為福眉為微替

爲袂袂或爲載載替聲相近

釋曰詩天保曰吉蠲爲饎是用孝享禴祠烝嘗于公
先王君曰卜爾萬壽無疆楚茨曰工祝致告徂賚孝
孫苾芬孝祀神嗜飲食卜爾百福如幾如式既齊既
工稷既匡既勅永錫爾極時萬時億卜予也此皆序嘏
主人之辭

主人坐奠爵興再拜稽首興受黍坐振祭濟之詩懷之
實于左袂挂于季指執爵以興坐卒爵執爵以興坐奠
爵拜尸荅拜執爵以興出宰夫以籩受嗇黍主人嘗之

納諸內

鄭注詩猶承也實于左袂便右手也季猶小也出出
戶也宰夫掌飲食之事者收斂曰嗇明豐年乃有黍
稷也復嘗之者重之至也納猶入也古文挂作卦
主人獻祝設席南面祝拜于席上坐受

鄭注室中迫狹有一

主人西面荅拜

鄭注不言拜送下尸

釋曰下戶嫁切後下尸同

薦兩豆菹醢

鄭注葵菹羸醢

佐食設俎牢髀橫脊一短脅一腸一胃一膚三魚一橫

之腊兩髀屬于尻

鄭注皆升下體祝賤也魚橫者四物共俎殊之也腊

兩髀屬于尻尤賤不殊

釋曰髀橫脊短脅皆下體也四物羊豕魚腊腊升左

右肝故尻在兩髀中連屬之

祝取菹換于醢祭于豆閒祝祭俎

鄭注大夫祝俎無肺祭用膚遠下尸不齊之膚不盛

釋曰大夫尸尊祝無祭肺又無離肺其祭用膚與餒

者同耳

祭酒啐酒肝牢從祝取肝換于鹽振祭濟之不興加于

俎卒爵興

鄭注亦如佐食授爵乃興不拜既爵大夫祝賤也

主人酌獻上佐食上佐食戶內牖東北面拜坐受爵主

人西面荅拜佐食祭酒卒爵拜坐授爵興

鄭注不啐而卒爵者大夫之佐食賤禮略

釋曰授石本作受公食內執東北面執坐受

俎設于兩階之間其俎折一膚執酒爵大夫俎也

鄭注佐食不得成禮于室中折者擇取牢正體餘骨

折分用之有胥而無薦亦遠下尸祭饗之不與賦于

釋曰無肺又無菹醢

主人又獻下佐食亦如之其胥亦設于階閒西上亦折

一膚

鄭注上佐食既獻則出就其俎特牲記曰佐食無事

則中庭北面謂此時

有司贊者取爵于篚以升授主婦贊者于房戶

鄭注男女不相因特牲饋食禮曰佐食卒角主人受

角降反于篚

婦贊者受以授主婦主婦洗于室中出酌入戶西面拜

獻尸

鄭注入戶西面拜由便也不北面者辟人君夫人也

拜而後獻者當俠拜也昏禮曰婦洗在北堂直室東

隅

釋曰特牲主婦北面拜凡大夫所辟者士多得與君同卑不嫌也

尸拜受主婦主人之北西面拜送爵

鄭注拜于主人之北西面婦人位在內此拜于北則

上拜于南矣

案此今注疏本訛作也脫矣字

由便也

尸祭酒卒爵主婦拜祝受尸爵尸荅拜易爵洗酌授尸

鄭注祝出易爵男女不同爵

主婦拜受爵尸荅拜上佐食綏祭主婦西面于主人之

北受祭祭之其綏祭如主人之禮不嘏卒爵拜尸荅拜

鄭注不嘏夫婦一體綏亦當作按古文為所

主婦以爵出贊者受易爵于篚以授主婦于房中

鄭注贊者有司贊者也易爵亦以授婦贊者婦贊者

受房戶外入授主婦

主婦洗酌獻祝祝拜坐受爵主婦荅拜于主人之北卒

爵不興坐受主婦

鄭注不俠拜下尸也今文曰祝拜受

主婦受酌獻上佐食于戶內佐食北面拜坐受爵主婦

西面荅拜祭酒卒爵坐授主婦主婦獻下佐食亦如之

主婦受爵以入于房

鄭注不言拜于主人之北可知也爵奠于內篚

賓長洗爵獻于尸尸拜受爵賓戶西北面拜送爵尸祭

酒卒爵賓拜祝受尸爵尸荅拜祝酌授尸賓拜受爵尸

拜送爵賓坐奠爵遂拜執爵以興坐祭遂飲卒爵執爵

以興坐奠爵拜尸荅拜賓酌獻祝祝拜坐受爵賓北面

荅拜祝祭酒啐酒奠爵于其筵前

鄭注啐酒而不啐爵祭事畢示醉也不獻佐食將饋

尸禮殺

釋曰啐爵當作卒爵

主人出立于阼階上西面祝出立于西階上東面祝告

曰利成

鄭注利猶養也成畢也孝子之養禮畢

釋曰特牲饋食禮戶外告利成此禮于階上尊者彌

遠于尸

祝入口謾主人降立于阼階東西面

鄭注謾起也謾或作休

祝先尸從遂出于庭門

鄭注事尸之禮訖于席門外

釋曰尸在席門外則疑于臣故送逆尸皆以席門為

斷

祝反復位于室中主人亦入于室復位祝命佐食徹所
俎降設于堂下阼階南

鄭注徹所俎不出門將饋尸也所俎而以饋尸者其
本為不反魚肉耳不云尸俎未歸尸

釋曰特牲饋食禮佐食徹尸俎出于席門即此所俎
司宮設對席乃四人養

鄭注大夫禮四人餽

餽餽今注疏本作養

明惠犬也

上佐食盥升下佐食對之賓長二人備

鄭注備四人餽也三餽亦盥升

釋曰上佐食坐尸之處

司士進一敦黍于上佐食又進一敦黍于下佐食皆右
之于席上

鄭注右之者東面在南西面在北

資黍于羊俎兩端兩下是餽

鄭注資猶減也減置于羊俎兩端則一賓長在上佐

食之北一賓長在下佐食之南今文資作齎
釋曰餽當如上下文作養

司士乃辯舉養者皆祭黍祭舉

鄭注舉舉膚今文辯為徧

主人西面三拜養者養者奠舉于俎皆荅拜皆反取舉
鄭注三拜旅之示徧也言反者拜時或去其席在東
面席者東面拜在西面席者皆南面拜

釋曰在西面者與主人同面故南面拜

司士進一鉶于上養又進一鉶于次養又進二豆滂于

兩下乃皆食食舉

鄭注滂肉汁也

釋曰神坐止有羊豕二鉶故兩下進滂也皆食食黍

也食舉食膚

卒食主人洗一爵升酌以授上養贊者洗三爵酌主人
受于戶內以授次養若是以辯皆不拜受爵主人西面
三拜養者養者奠爵皆荅拜皆祭酒卒爵奠爵皆拜主
人荅壹拜

鄭注不拜受爵者大夫餽者賤也荅壹拜略也古文

壹為一也

釋曰周禮九拜有奇拜謂一拜也荅臣下之拜

養者三人興出

鄭注出降實爵于篚反賓位

上養止主人受上養爵酌以醋于戶內西面坐奠爵拜

上養荅拜坐祭酒啐酒

鄭注主人自酢者上養獨止當尸位尊不酌也

上養親嘏曰主人受祭之福胡壽保建家室

鄭注親嘏不使祝授之亦以黍

主人興坐奠爵拜執爵以興坐卒爵拜上養荅拜上養

興出主人送乃退

鄭注送佐食不拜賤

儀禮集釋卷二十八

儀禮集釋卷二十九

宋 李 如 圭 撰

有司徹第十七

鄭目錄云少牢之下篇也上大夫既祭饋尸于堂之禮若下大夫祭畢禮尸于室中無別行饋尸于堂之事天子諸侯之祭明日而繹有司徹于五禮屬吉禮

案今注疏本脫禮字

大戴第九小戴第十二別錄少牢下篇第

十七

有司徹

鄭注徹室中之饋及祝佐食之俎卿大夫既祭而饋
 尸禮崇也饋尸則不設饌西北隅以此薦俎之陳有
 祭象而亦足以厭飫神天子諸侯明日祭于祊而繹
 春秋傳曰辛巳有事于太廟仲遂卒于垂壬午猶繹
 是也爾雅曰繹又祭也于室中無報饋曰于堂之
 埽堂曰於室之於堂之於室也士大夫則祭則曰于堂之
 鄭注為饋尸新之少儀曰汎埽曰埽埽席前曰拚

司宮攝酒

鄭注更洗益整頓之今文攝為聶

乃燔尸俎

鄭注燔温也温尸俎于爨所亦温焉獨言温尸俎則
 祝與佐食不與饋尸之禮古文燔皆作尋記或作燔
 春秋傳曰若可燔也亦可寒也

釋曰燔說文曰于湯中爇肉也尸俎神俎也尸所舉
 肩骼加于所者下皆復載于俎知所俎亦燔
 卒燔乃升羊豕魚三鼎無腊與膚乃設局甬陳鼎于門
 外如初

鄭注腊為庶羞膚從豕去其鼎者饋尸之禮殺于初

如初者如廟門之外東方北面北上今文局為鉉古文鼎為密

乃議侑于賓以異姓

鄭注議猶擇也擇賓之賢者可以侑尸必用異姓廣敬也是時主人及賓有司已復內位古文侑皆作宥

宗人戒侑

鄭注戒猶告也南面告于其位戒曰請子為侑

侑出俟于廟門之外

鄭注俟待也待于外當與尸更入主人興禮事尸極

敬心也

司宮筵于戶西南面

鄭注為尸席也

又筵于西序東面

鄭注為侑席也

釋曰尸侑席位與鄉飲酒賓介之位同

尸與侑北面于廟門之外西上

鄭注言與殊尊卑北面者賓尸而尸益卑西上統于

賓客

主人出迎戶宗人擯

鄭注賓客戶而迎之主人益尊擯贊

釋曰鄉者祝擯戶神象今宗人擯賓戶也

主人拜戶荅拜主人又拜侑侑荅拜主人揖先入門右

鄭注道戶

戶入門左侑從亦左揖乃讓

鄭注沒雷相揖至階又讓

釋曰沒雷至門內雷

主人先升自阼階戶侑升自西階西楹西北面東上

鄭注東上統于其席

釋曰異于門外西上也戶西之席東上侑席亦西于

戶席

主人東楹東北面拜至戶荅拜主人又拜侑侑荅拜

鄭注拜至喜之

乃舉

鄭注舉舉鼎也舉者不盥殺也

司馬舉羊鼎司士舉豕鼎舉魚鼎以入陳鼎如初

鄭注如初如阼階下西面北上

雍正執一匕以從雍府執二匕以從司士合執二俎以從司士贊者亦合執二俎以從匕皆加于鼎東枋二俎設于羊鼎西西縮二俎皆設于二鼎西亦西縮

鄭注雍正羣吏掌辨體名肉物者府其屬凡三七鼎一匕四俎為尸侑主人主婦其二俎設于豕鼎魚鼎之西陳之宜具也古文縮皆為蹙

釋曰四俎皆載羊體之正俎而分陳二鼎西者欲使鼎具有俎

雍人合執二俎陳于羊俎西竝皆西縮覆二疏匕于其

上皆縮俎西枋

鄭注竝併也其南俎司馬以羞羊匕清羊肉清其北俎司士以羞豕匕清豕肉清豕脊清魚疏匕匕柄有刻飾者古文竝皆作併

釋曰二俎上有匕知以羞匕清既則以羞羊肉清豕脊下經羊肉清載于南俎匕清皆次賓羞之侑魚清司馬羞之而槩云司馬司士者因司馬刲羊司士擊豕而統言之疏者疏通刻飾之名明堂有疏屏豕肉清三字衍即豕脊也

主人降受宰几尸侑降主人辭尸對

鄭注几所以坐安體周禮大宰掌贊玉几玉爵

宰授几主人受二手橫執几揖尸

鄭注獨揖尸几禮主于尸

主人升尸侑升復位

鄭注位阼階賓階上位

主人西面左手執几縮之以右袂推拂几三二手橫執

几進授尸于筵前

鄭注衣袖謂之袂

案此下今注疏本有拂者外拂之也六字

推拂去塵示

新

尸進二手受于手閒

鄭注受從手閒謙也

主人退尸還几縮之右手執外廉北面奠于筵上左之

南縮不坐

鄭注左之者異于鬼神生人陽長左鬼神陰長右不

坐奠之者几輕

主人東楹東北面拜

鄭注拜送几也

尸復位尸與侑皆北面荅拜

鄭注侑拜者從于尸

主人降洗尸侑降尸辭洗主人對卒洗揖主人升尸侑升尸西楹西北面拜洗主人東楹東北面奠爵荅拜降盥尸侑降主人辭尸對卒盥主人揖升尸侑升主人坐取爵酌獻尸尸北面拜受爵主人東楹東北面拜送爵

鄭注降盥者爲土汚手不可酌

主婦自東房薦韭菹醢坐奠于筵前菹在西方婦贊者執昌菹醢以授主婦主婦不興受陪設于南昌在東方

興取籩于房麴蕡坐設于豆西當外列麴在東方婦贊者執白黑以授主婦主婦不興受設于初籩之南曰在西方興退

鄭注昌昌本也韭菹醢昌本麴麴蕡熬麥也蕡熬泉實也白熬稻黑熬黍此皆朝事之豆籩大夫無朝事而用之儻尸亦豐大夫之禮主婦取籩興者以饌異親之當外列辟劔也退退入房也

釋曰先獻後薦異于祭也陪設重列之也籩人掌朝事之籩其實麴蕡白黑醢人掌朝事之豆其實韭菹

醢醢昌本麋麇凡無骨為醢有骨為麇當外列麇在昌菹西韭菹西以俟亞獻設鉶

乃升

鄭注升牲體于俎也

司馬牝羊亦司馬載載右體肩臂肫骼膍正脊一脰脊一橫脊一短脊一正脊一代脊一腸一胃一祭肺一載于一俎

鄭注言鞅尸俎復序體者明所舉肩骼存焉亦著脊脊皆一骨也膍在下者折分之以為肉消貶也

案貶今注

疏本訛作俎

一俎謂司士所設羊鼎西第一俎

釋曰此尸之羊正俎也復肩骼于俎與正祭神俎同其異者脊脊腸胃祭肺皆一又無舉肺且折分其膍故降膍在骼下第一俎謂羊鼎西之南俎羊肉消俎在豕俎之南知尸俎亦在侑俎南

羊肉消膍折正脊一正脊一腸一胃一膍肺一載于南俎

鄭注肉消肉在汁中者以增俎實為尸加也必為膍折上所折分者膍肺離肺也南俎雍人所設在南者

此以下十一俎俟時而載于此歷說之爾今文消為
汁

釋曰此羊加俎也以肉初在消中故異其名曰羊肉
消膍折折分正俎之膍也凡祭肺切之膍肺離之祭
肺祭而不膍膍肺膍而亦祭祭肺尊故加俎用膍肺
祭肺又名切肺剗肺膍肺又名離肺舉肺南俎羊俎
西之南俎尸羊俎以下凡十二俎其四俎尸侑主人
主婦之正俎餘八俎以雍人所設二俎往還載之
司士牝豕亦司士載亦右體肩臂肫骼膍正脊一脰脊

一橫脊一短脊一正脊一代脊一膚五膍肺一載于一
俎

鄭注膍在下者順羊也俎謂雍人所設在北者
釋曰此豕脊也豕無正俎不折膍膍亦在下順上文
也

侑俎羊左肩左肫正脊一膍一腸一胃一切肺一載于一
一俎侑俎豕左肩折正脊一膍一膚三切肺一載于一
俎

鄭注侑俎用左體侑賤其羊俎過三體有肫尊之加

也豕左肩折折分爲長兄弟俎也切肺亦祭肺互言之爾無羊清下尸也豕又祭肺不齊肺不備禮俎司

士所設羊鼎西之北俎也豕俎與尸同

釋曰體數奇而侑羊俎四體尊侑而加肫也羊正俎

用祭肺豕加俎當用齊肺此豕俎與尸同用雍人羊

俎西之北俎

阼俎羊肺一祭肺一載于一俎羊肉清臂一脊一脅一

腸一胃一齊肺一載于一俎豕脊臂一脊一脅一膚三

齊肺一載于一俎

鄭注阼俎主人俎無體遠下尸也以肺代之肺尊也

加羊肉清而有體崇尸惠亦尊主人臂左臂也侑用

肩主人用臂下之也不言左臂者大夫尊空其文也

降于侑羊體一而增豕膚三有所屈有所申亦所謂

順而撫也阼俎司士所設豕鼎西俎也其清俎與尸

俎同豕俎又與尸豕俎同

釋曰侑無羊肉清尸酢主人而有之三體降于侑羊

俎一爲屈膚三增于主婦俎二則申撫之石反猶拾

也拾取上禮用之

主婦俎羊左臠脊一脅一腸一胃一膚一膾羊肺一載于一俎

鄭注無豕體而有膚以主人無羊體不敢備也無祭肺有膾肺亦下脔也祭肺尊言膾羊肺者文承膚下嫌也膚在羊肺上則羊豕之體名同相亞也其俎司士所設在魚鼎西者

釋曰豕之膚猶羊之腸胃故膚次腸胃下羊肺上言羊肺嫌是豕肺膾肺同于脔

司士牝魚亦司士載尸俎五魚橫載之脔主人皆一魚

亦橫載之皆加膾祭于其上

鄭注橫載之者異于牲體彌變于神膾讀如殷尋之尋刳魚時割其腹以為大臠也可用祭也其俎又與

尸豕俎同

釋曰食生薦神魚俎縮俎右首此橫于俎則進其尾也少儀曰羞濡魚者進尾冬右腴夏右鰭祭膾濡魚此所謂魚清尋或呼孤反覆也

卒升

鄭注卒已也已載尸羊俎

賓長設羊俎于豆南賓降尸升筵自西方坐左執爵右取韭菹揆于三豆祭于豆間尸取麴蕡宰夫贊者取白黑以授尸尸受兼祭于豆祭

鄭注賓長上賓

雍人授次賓疏匕與俎受于鼎西左手執俎左廉縮之卻右手執匕枋縮于俎上以東面受于羊鼎之西司馬在羊鼎之東二手執挑匕枋以挹清注于疏匕若是者

三

鄭注挑謂之歆讀如或春或抗之抗字或作挑者秦

人語也此二匕者皆有淺升狀如飯操挑長枋可以

抒物于器中者注猶寫也

蔡寫今注疏本作瀉

今文挑作抗挹

皆為挹

尸興左執爵右取肺坐祭之祭酒興左執爵

鄭注肺羊祭肺

次賓縮執匕俎以升若是以授尸尸卻手受匕枋坐祭

啻之興覆手以授賓賓亦覆手以受縮匕于俎上以降

鄭注啻清者明清肉加耳嘗之以其汁尚味

之豕不曰肉清而曰豕胥曰肉清者言肉初在清中
曰胥者明在俎時無汁羊豕互文也魚無匕清言清
魚者明魚在清耳俎降以俟羞羊肉清

尸席末坐啐酒興坐奠爵拜告旨執爵以興主人北面
于東楹東荅拜

鄭注旨美也拜告酒美荅主人意古文曰東楹之東
司馬羞羊肉清縮執俎尸坐奠爵興取肺坐絕祭嚼之
興反加于俎司馬縮奠俎于羊清俎南乃載于羊俎卒
載俎縮執以降案各本作縮執俎以
降唐石經無俎字

鄭注絕祭絕肺末以祭周禮曰絕祭清使次賓肉使
司馬大夫禮多崇敬也

釋曰正俎皆橫執于席前橫設之加俎皆縮執于席
前縮奠之羊清俎清字衍下尸酢主人司馬縮奠清
俎于羊俎西

尸坐執爵以興次賓羞羊燔縮執俎縮一燔于俎上鹽
在右尸左執爵受燔換于鹽坐振祭嚼之興加于羊俎
賓縮執俎以降

鄭注燔炙

釋曰羞羊燔亦當以羊肉清之俎鄭不言或者曰有俎與當攷主人獻尸之從獻五邊豆一俎二羊匕清三羊肉滑四羊燔五侑降于尸無羊清羊肉清王人受酢從獻與尸同五主婦與侑同三尊卑之差也尸降筵北面于西楹西坐卒爵執爵以興坐奠爵拜執爵以興主人北面于東楹東荅拜主人受爵尸升筵立于筵末主人酌獻侑侑西楹西北面拜受爵主人在其右北面荅拜

鄭注不洗者俱獻閒無事也主人就右者賤不專階釋曰獻閒無他酢酬故不洗也若爵自卑者來獻尊者則否

主婦薦韭菹醢坐奠于筵前醢在南方婦贊者執二邊麴蕢以授主婦主婦不興受之奠麴于醢南蕢在麴東主婦入于房

鄭注醢在南方者立侑爲尸使正饌統焉侑升筵自北方司馬橫執羊俎以升設于豆東侑坐左執爵右取菹換于醢祭于豆閒又取麴蕢同祭于豆祭興左執爵右取肺坐祭之祭酒興左執爵次賓羞羊燔

如尸禮侑降筵自北方北面于西楹西坐卒爵執爵以與坐奠爵拜主人荅拜于豆間及奠饗同祭于豆祭

鄭注荅拜拜于侑之右

釋曰侑與主婦無羊肉清故羊俎皆司馬設之

尸受侑爵降洗侑降立于西階西東面主人降自阼階辭洗尸坐奠爵于篚與對卒洗主人升尸升自西階主

人拜洗尸北面于西楹西坐奠爵荅拜降盥主人降尸辭主人對卒盥主人升尸升坐取爵酌

鄭注酌者將酢主人

司宮設席于東序西面主人東楹東北面拜受爵尸西楹西北面荅拜主婦薦韭菹醢坐奠于筵前菹在北方婦贊者執二籩饗主婦不興受設饗于菹西北黃在饗西主人升筵自北方主婦入于房

鄭注設籩于菹西北亦辟劔今文無二籩

字

釋曰菹北當設籩豆于劔西設籩

長賓設羊俎于豆西主人坐左執爵祭豆籩如侑之祭興左執爵右取肺坐祭之祭酒興次賓羞匕清如尸禮

席末坐啐酒執爵以興司馬羞羊肉清縮執俎主人坐奠爵于左興受肺坐絕祭濟之興反加于清俎司馬縮奠清俎于羊俎西乃載之卒載縮執虛俎以降

鄭注奠爵于左者神惠變于常也言受肺者明有授言虛俎者羊清俎訖于此虛不復用

釋曰神惠右不舉變于飲酒也賈氏曰羊俎西之南俎不復用則羞羊燔用北之豕俎

主人坐取爵以興次賓羞燔注人受如尸禮主人降筵自北方北面于阼階上坐卒爵執爵以興坐奠爵拜執

爵以興尸西楹西荅拜主人坐奠爵于東序南

鄭注不降奠爵于筐急崇酒

侑升尸侑皆北面于西楹西

鄭注見主人不反位知將與己為禮

主人北面于東楹東再拜崇酒

鄭注崇充也拜謝尸侑以酒薄充滿

尸侑皆荅再拜主人及尸侑皆升就筵司宮取爵于筐以授婦贊者于房東以授主婦

鄭注房東房戶外之東

主婦洗于房中

案今注疏本作洗爵于房中唐石經亦無爵字

出實爵尊南西

面拜獻尸口拜于筵上受

鄭注尊南西面拜由便也

主婦西面于主人之席北拜送爵入于房取一羊釧坐
尊于韭菹西主婦贊者執豕釧以從主婦不興受設于
羊釧之西興入于房取糗與殿脩執以出坐設之糗在
黃西脩在白西興立于主人席北西面

鄭注飲酒而有釧者祭之餘釧無黍稷殺也糗糗餌
也殿脩擣肉之脯今文殿為斷

尸坐左執爵祭糗脩同祭于豆祭以羊釧之柶挹羊釧
遂以挹豕釧祭于豆祭酒次賓羞豕匕清如羊匕清
之禮尸坐啐酒左執爵嘗上釧執爵以興坐奠爵拜主
婦荅拜執爵以興司士羞豕膋尸坐奠爵興受如羊肉
清之禮坐取爵興次賓羞豕燔尸左執爵受燔如羊燔
之禮坐卒爵拜主婦荅拜受爵酌獻侑侑拜受爵主婦
主人之北西面荅拜

鄭注酌獻者主婦今文無西面

釋曰亞獻之從獻五釧一糗脩二豕匕清三豕膋四

豕燔五侑無鉶與豕匕清主人與尸同五
 主婦羞糗脩坐奠糗于饗南脩在費南脩坐左執爵取
 糗脩兼祭于豆祭司士縮執豕脣以升侑興取肺坐祭
 之司士縮奠豕脣于羊俎之東載于羊俎卒乃縮執俎
 以降侑興

鄭注豕脣無清于侑禮殺

次賓羞豕燔侑受如尸禮坐卒爵拜主婦答拜受爵酌
 以致于主人主人筵上拜受爵主婦北面于阼階上答
 拜

鄭注主婦易位拜于阼階上辟併敬于東
 主婦設二鉶與糗脩如尸禮主人共祭糗脩祭鉶祭酒
 受豕匕清拜啐酒皆如尸禮嘗鉶不拜

鄭注主人如尸禮尊也其異者不告旨

釋曰尸啐酒不拜而云拜啐酒如尸禮者特牲少牢
 饋食禮尸嘗鉶不拜則此尸嘗鉶拜仍為啐酒也或
 拜字衍

其受豕脣受豕燔亦如尸禮坐卒爵拜主婦北面答拜
 受爵尸降筵受主婦爵以降

鄭注將酢主婦

主人降侑降主婦入于房主人立于洗東北西面侑東面于西階西南

鄭注俟尸洗

尸易爵于篚盥洗爵

鄭注易爵者男女不相襲爵

主人揖尸侑

鄭注將升

主人升尸升自西階侑從主人北面立于東楹東侑西

楹西北面立

鄭注俟尸酌

尸酌主婦出于房西面拜受爵尸北面于侑東荅拜主婦入于房司宮設席于房中南面主婦立于席西

鄭注設席者主婦尊今文曰南面立于席西

婦贊者薦韭菹醢坐與于筵前菹在西方婦人贊者執麴蕡以授婦贊者婦贊者不興受設麴于菹西蕡在麴

南

鄭注婦人贊者宗婦之少者

主婦升筵司馬設羊俎于豆南主婦坐左執爵右取菹
 捩于醢祭于豆間又取饗蕢兼祭于豆祭主婦奠爵興
 取肺坐絕祭臍之興加于俎坐捩手祭酒啐酒實五
 鄭注捩手者于悅悅佩巾內則曰婦人亦左佩紛悅
 古文捩作說主獻奠今文曰南面立
 釋曰主婦羊俎臍肺不祭肺故絕祭捩手
 次賓羞羊燔主婦興受燔如主人之禮主婦執爵以出
 于房西面于主人席北立卒爵執爵拜尸西楹西北面
 答拜主婦入立于房尸主人及侑皆就筵

鄭注出房立卒爵宜鄉尊不坐者變于主人也執爵
 拜變于男子也

上賓洗爵以升酌獻尸尸拜受爵賓西楹西北面拜送
 爵尸奠爵于薦左賓降

鄭注上賓賓長也謂之上賓以將獻異之或謂之長
 賓奠爵爵止也

釋曰奠于薦左尸後舉之神惠右不舉

主人降洗觶案觶今注疏本作爵下兩尸侑降主人奠

爵于篚辭尸對卒洗揖尸升侑不升

鄭注侑不升尸禮益殺不從

主人實觶酬尸東楹東北面坐奠爵拜尸西楹西北面
荅拜坐祭遂飲卒爵拜尸荅拜降洗尸降辭主人奠爵
于篚對卒洗主人升尸升主人實觶尸拜受爵主人反
位荅拜尸北面坐奠爵于薦左

鄭注降洗者主人

釋曰奠于薦左者奠酬不舉也神惠右不舉而此左
不舉者賓尸而酬之同于賓客異于神惠

尸侑主人皆升筵乃羞宰夫羞房中之羞于尸侑主人

主婦皆右之司士羞庶羞于尸侑主人主婦皆左之

鄭注二羞所以盡歡心房中之羞其籩則糗餌粉飧
其豆則醢食糝食庶羞羊臠豕臠皆有載醢房中之
羞內羞也內羞在右陰也庶羞在左陽也

釋曰內羞穀物庶羞牲物內羞周禮曰羞籩羞豆臠
許堯反

主人降南面拜眾賓于門東三拜眾賓門東北面皆荅

壹拜

鄭注拜于門東明少南就之也言三拜者眾賓賤旅

之也眾賓壹拜賤也卿大夫尊賓賤純臣也位在門東古文壹為一

釋曰特牲饋食禮記私臣門東北面

主人洗爵長賓辭主人奠爵于篚興對卒洗升酌獻賓

于西階上長賓升拜受爵主人在其右北面荅拜宰夫

自東房薦脯醢醢在西司士設俎于豆北羊骼一腸一

胃一切肺一膚一

鄭注羊骼羊左骼上賓一體賤也薦與設俎者既則

俟于西序端古文骼為胙

釋曰俟俟執薦俎從賓降鄉飲酒司正升相旅退立

于序端

賓坐左執爵右取脯揆于醢祭之執爵興取肺坐祭之

祭酒遂飲卒爵執爵以興案各本脫爵字據唐石經補坐奠爵拜執

爵以興主人荅拜受爵賓坐取祭以降西面坐委于西

階西南

鄭注成祭于上尊賓也取祭以降反下位也反下位

而在西階西南已獻尊之祭脯肺

釋曰賓自門東而位西階西南猶燕禮士卒于西方

已獻而位于東方也衆賓以下則已獻而設薦俎于其位

宰夫執薦以從設于祭東司士執俎以從設于薦東衆賓長升拜受爵主人荅拜坐祭立飲卒爵不拜既爵

鄭注既盡也長賓升者以次第升受獻言衆賓長拜則其餘不拜

宰夫贊主人酌若是以辯

鄭注主人每獻一人奠空爵于楹宰夫酌授于尊南今文若爲如辯皆爲徧

辯受爵其薦脯醢與胾設于其位其位繼上賓而南皆東面其胾體儀也

鄭注徧獻乃薦畧之亦宰夫薦司士胾儀者尊體盡儀度餘骨可用而用之尊者用尊體卑者用卑體而已亦有切肺膚今文儀皆作臠或爲議

乃升長賓主人酌酢于長賓西階上北面賓在左鄭注言升長賓則有贊者爲之主人酌自酢序賓意賓卑不敢酢

主人坐奠爵拜執爵以興賓荅拜坐祭遂飲卒爵執爵



影像重复

以興坐奠爵拜賓荅拜賓降

鄭注降反位

儀禮集釋卷二十九

辯受爵其薦脯醢與胥設于其位其位繼上賓而南皆東面其胥體儀也

鄭注徧獻乃薦畧之亦宰夫薦司士胥儀者尊體盡儀度餘骨可用而用之尊者用尊體卑者用卑體而已亦有切肺膚今文儀皆作臠或為議

乃升長賓主人酌酢于長賓西階上北面賓在左

鄭注言升長賓則有贊者為之主人酌自酢序賓意賓卑不敢酢

主人坐奠爵拜執爵以興賓荅拜坐祭遂飲卒爵執爵

以興坐奠爵拜賓荅拜賓降

鄭注降反位

儀禮集釋卷二十九

儀禮集釋卷三十

有司徹

宋 魏 而 李 如 圭 撰

宰夫洗解以升主人受酌降酬長賓于西階南北面賓
在左主人坐奠爵拜賓荅拜坐祭遂飲卒爵拜賓荅拜
注鄭注宰夫受主人解則受其虛爵奠于篚古文酌爲

爵案今注疏本脫此五字

釋曰上主人卒爵不言降知虛爵

主人洗賓辭主人坐奠爵于篚對卒洗升酌降復位賓

拜受爵主人拜送爵賓西面坐奠爵于薦左

釋曰奠于左者後舉之與不償尸之禮奠酬同神惠右不舉

主人洗升酌獻兄弟于阼階上兄弟之長升拜受爵主人在其右荅拜坐祭立飲不拜既爵皆若是以辯答

鄭注兄弟長幼立飲賤不別大夫之賓尊于兄弟宰夫不贊酌者兄弟以親昵來不以官待之

釋曰兄弟雖賤而親故主人親酌之士之兄弟長則賓衆兄弟如衆賓

辯受爵其位在洗東西面北上升受爵其薦胥設于其位

鄭注亦辯獻乃薦既云辯矣復言升受爵者爲衆兄弟言也衆兄弟升不拜受爵先著其位于上乃後云薦胥設于其位明位初在是也位不繼于主人而云洗東卑不統于尊此薦胥皆使私人

釋曰賓拜受受爵拜既爵衆賓及長兄弟不拜既爵衆兄弟又不拜受爵故別言升受爵也兄弟已獻不變其位特牲饋食禮兄弟位主人之南者士卑故繼

主人言之士冠禮兄弟立于洗東西面北上

其先生之胥折胥一膚一

鄭注先生長兄弟折豕左肩之折

釋曰折分侑俎豕左肩之折

其衆儀也主人洗獻內賓于房中南面拜受爵主人南

面于其右荅拜

鄭注內賓姑姊妹及宗婦獻于主婦之席東主人不

西面尊不與爲賓主禮也南面于其右主人之位恒

左人

釋曰特牲主人西面

坐祭立飲不拜既爵若是以辯亦有薦胥

鄭注亦設薦胥于其位特牲饋食禮記曰內賓立于

房中西墉下東面南上宗婦北堂東面北上

主人降洗升獻私人于阼階上拜于下升受主人荅其

長拜乃降坐祭立飲不拜既爵若是以辯宰夫贊主人

酌主人于其羣私人不荅拜其位繼兄弟之南亦北上

亦有薦胥

鄭注私人家臣也案今注疏本無也字所自謁除也大夫言私

人明不純臣也士言私臣明有君之道北上不敢專其位亦有薦胥初亦北面在眾賓之後爾言繼者以爵既獻為文凡獻位定釋曰大夫曰私人辟君特牲饋食禮私臣門東北面此亦然既獻乃位兄弟之南北上繼于兄弟不敢別自為列凡專其位者雖共方皆別自為上士喪禮朝夕哭大夫即位于門外西面北上兄弟在南南上賓繼之北上是也謁除謂謁于君除其課役主人就筵

鄭注古文曰升就筵

尸作三獻之爵

鄭注上賓所獻爵不言三獻作之者賓尸而尸益卑可以自舉

司士羞清魚縮執俎以升尸取膾祭祭之祭酒卒爵

鄭注不羞魚匕清略小味也羊有正俎羞匕清肉清豕無正俎魚無匕清隆污之殺

司士縮奠俎于羊俎南橫載于羊俎卒乃縮執俎以降尸奠爵拜三獻北面荅拜受爵酌獻侑侑拜受三獻北

面荅拜司馬羞清魚一如尸禮卒爵拜三獻荅拜受爵

鄭注司馬羞清魚變于尸

酌致主人主人拜受爵三獻東楹東北面荅拜

鄭注賓拜于東楹東以主人拜受于席就之

釋曰賓之禮當于西階

司士羞一清魚如尸禮卒爵拜三獻荅拜受爵尸降筵

受三獻爵今注疏本脫爵字酌以酢之

鄭注既致主人尸乃酢之遂賓意

三獻西楹西北面拜受爵尸在其右以授之尸升筵南

面荅拜坐祭遂飲卒爵拜尸荅拜執爵以降實于篚二

人洗觶升實爵西楹西北面東上坐奠爵拜執爵以興

尸侑荅拜坐祭遂飲卒爵執爵以興坐奠爵拜尸侑荅

拜皆降

鄭注三獻而禮小成使二人舉爵序殷勤于尸侑

洗升酌反位尸侑皆拜受爵舉觶者皆拜送侑奠觶于

右

鄭注奠于右者不舉也神惠右不舉變于飲酒

尸遂執觶以興北面于阼階上酬主人主人在右

鄭注尸拜于阼階上酬禮殺酒主人主人亦
坐奠爵拜主人荅拜不祭立飲卒爵不拜既爵酌就于
阼階上酬主人

鄭注言就者主人立待之

主人拜受

案此下各本有爵字據唐石經刪

尸拜送

鄭注酬不奠者急酬侑也

尸就筵主人以酬侑于西楹西侑在左坐奠爵拜執爵
與侑荅拜不祭立飲卒爵不拜既爵酌復位侑拜受主
人拜送

鄭注言酌復位明授于西階上

主人復筵乃升長賓侑酬之如主人之禮

鄭注遂旅也言升長賓則有贊呼之

至于衆賓遂及兄弟亦如之皆飲于上

鄭注上西階上

遂及私人拜受者升受下飲

鄭注私人之長拜于下升受兄弟之爵下飲之

卒爵升酌以之其位相酬辯

鄭注其位兄弟南位亦拜受拜送升酌由西階

釋曰卒爵受獻惟荅其長拜故受酬亦其長得升受羣私人以之其位相酬耳

卒飲者實爵于筐

鄭注末受酬者雖無所旅猶飲

乃羞庶羞于賓兄弟內賓及私人

鄭注無房中之羞賤也此羞同時羞則酌房中亦旅

其始主婦舉觶于內賓遂及宗婦

釋曰內羞賓文在私人之上私人得酬則內賓亦旅

可知

兄弟之後生者舉觶于其長

鄭注後生年少也古文觶皆為爵延熹中詔校書定

作觶

洗升酌降北面立于阼階南長在左坐奠爵拜執爵以

興長荅拜

鄭注長在左辟主人

釋曰獻酬之位主人在右

坐祭遂飲卒爵執爵以興坐奠爵拜執爵以興長荅拜

洗升酌降長拜受于其位舉爵者東面荅拜爵止

鄭注拜受荅拜不北面者儻口禮殺長賓言奠兄弟言止互相發明相待也

釋曰爵止謂奠之此爵與前主人酬賓之觶後竝行為無算爵特牲饋食禮兄弟弟子舉觶于其長皆北面拜送

賓長獻于尸如初無清爵不止

鄭注賓長者賓之長次上賓者非即上賓也如初如其獻侑酌致主人受尸酢也無清爵不止別不如初者不使兄弟不稱加爵大夫尊也不用觶大夫尊者

也

釋曰賓長衆賓之長次上賓者清酒魚也特牲饋食禮長兄弟洗觶為加爵衆賓長亦為加爵此言獻者若三獻之外更容有獻優之也用爵者爵尊于觶賓一人舉爵于尸如初亦遂之于下

鄭注一人次賓長者如初如二人洗觶之為也遂之于下者遂及賓兄弟下至于私人是言亦遂之于下

案今注疏本作故上言無清爵不止互相發明言亦遂之于下也

釋曰賓長獻一人舉爵皆如初無清爵不止別其異

者亦遂之于下明其同者此禮皆如上二人洗解至

卒飲者實爵于篚惟不奠爵于薦耳

賓及兄弟交錯其酬皆遂及私人爵無算

鄭注算數也長賓取觶酬兄弟之黨長兄弟取觶酬

賓之黨惟己所欲無有次第之數也

尸出侑從主人送于席門之外拜尸不顧

鄭注拜送之

拜侑與長賓亦如之眾賓從

鄭注從者不拜送也

司士歸尸侑之俎

鄭注尸侑尊送其家

主人退

鄭注反于寢也

有司徹

鄭注徹堂上下之薦俎也外賓尸雖堂上婦人不徹

若不償尸

案償各本作賓據唐石經訂正

鄭注不償尸謂下大夫也其牲物則同不得備其禮

耳舊說云謂大夫有疾病攝昆弟祭曾子問曰攝主

不厭祭不旅不假不綏祭不配布奠于賓賓奠而不舉而此備有似失之矣

釋曰厭祭陽厭也旅旅酬也假假主人也綏祭主人墮減黍稷牢肉以祭也配言某妃配也布奠謂主人酬賓奠觶于薦北賓奠謂取觶奠于薦南舉舉之以行旅酬也此不償之禮亦具有之

則祝侑亦如之

鄭注謂尸七飯時

尸食

鄭注八飯

乃盛俎臠臂肫脰脊橫脊短脅代脅皆牢

鄭注盛者盛于所俎也此七體羊豕其脊脅皆取一骨也與所舉正脊幹骼凡十矣肩未舉既舉而俎猶有六體焉

釋曰俎有十一體三脊三脅皆二骨既舉而三脊三脅各遺一骨

魚七

鄭注盛半也魚十有五而俎其一已舉必盛半者魚

無足翼于牲象脊脅而已

釋曰特有脅亦谷盛半

腊辨無髀

鄭注亦盛半也所盛者右體也脊屬焉言無髀者云

一純而俎嫌有之古文髀作脾

釋云下云撫于魚腊俎則腊不盡盛亦盛半與魚同

辨者蓋辨盛右體也右脛骨五與脅骨三而八前已

舉右肩今盡盛其餘三脊骨亦盛焉俎所存者左脛

骨與脅骨八个耳上篇云腊一純而俎其兩髀左祝

俎尸俎無髀自明不饋尸之禮髀之所用無文故云

無髀以明之

卒盛乃舉牢肩尸受振祭濟之佐食受加于所

鄭注卒已

佐食取一俎于堂下以入奠于羊俎東

鄭注不言魚俎東主于尊

釋曰魚在羊東此俎又奠于魚東繼羊言之耳

乃撫于魚腊俎俎釋三个其餘皆取之實于一俎以出

鄭注个猶枚也魚撫四枚腊撫五枚其所釋者腊則

短脅正脅代脅魚三枚而已古文撫為揲

釋曰祝主人之脂用脛體取于所撫則所釋者蓋三

脅骨

祝主人之魚腊取于是

鄭注祝主人主婦俎之魚腊取于此者大夫之禮文

待神餘也三者各取一魚其腊主人臂主婦臠祝則

腊也與此皆于鼎側更載焉不言主婦未聞

釋曰特牲主人主婦祝皆無魚腊下主婦俎有腊臠

此經不言主婦未聞其義或傳寫脫耳

尸不飯告飽主人拜侑不言尸又三飯

鄭注凡十一飯士九飯大夫十一飯其餘十有三飯

十五飯

佐食受牢舉如儻

鄭注舉肺脊

釋曰儻謂上篇及此篇有賓尸之禮者

主人洗酌酌尸賓羞肝皆如儻禮卒爵主人拜祝受尸

爵尸荅拜祝酌授尸尸以醋主人亦如儻其綏祭其嘏

亦如儻

不鄭注肝牢肝也綏皆當作接接讀為藏其隋之隋古
 文為換 鄭注自尸侑不飯告飽至此與儻同者在上篇
 其獻祝與二佐食其位其薦胥皆如儻主婦其洗獻于
 尸亦如儻

鄭注自尸侑不飯告飽至此與儻同者在上篇

主婦反取籩于房中執棗糗坐設之棗在稷南糗在棗
 南婦贊者執栗脯主婦不興受設之栗在糗東脯在棗
 東主婦興反位

鄭注棗饋食之籩糗羞籩之實雜用之下賓尸也栗

脯加籩之實也反位反主人之北拜送爵位

案送今注疏本

訛作還

釋曰籩人掌饋食之籩其實棗栗加籩之實棗脯羞

籩之實糗餌

尸左執爵取棗糗祝取栗脯以授尸尸兼祭于豆祭祭
 酒啐酒次賓羞牢燔用俎鹽在右尸兼取燔換于鹽振
 祭嚼之祝受加于所卒爵主婦拜祝受尸爵尸荅拜

鄭注自主婦反取籩

案各本脫取字據經文補

至祝受加于所此

異于儻

祝易爵洗酌授尸尸以醋主婦主婦主人之北拜受爵
尸荅拜主婦反位又拜上佐食綏祭如儻卒爵拜尸荅
拜

鄭注主婦夾爵拜為不儻尸案儻今注疏本訛作賓降崇敬今

文醋曰酌

釋曰士妻獻尸不夾爵內子獻尸夾爵拜下大夫不
儻尸雖與士同仍同內子夾爵拜

主婦獻祝其酌如儻拜坐受爵主婦主人之北荅拜
鄭注自尸卒爵至此亦與儻同者亦在上篇

釋曰經無尸卒爵之文鄭注云尸者以經有卒爵之
文多故言尸以別之也

宰夫薦棗糗坐設棗于菹西糗在棗南祝左執爵取棗
糗祭于豆祭祭酒啐酒次賓羞燔如尸禮卒爵
鄭注內子不薦籩祝賤使官可也自宰夫薦至賓羞
燔亦異于儻

釋曰特牲主婦設籩

主婦受爵酌獻二佐食亦如儻主婦受爵以入于房賓
長洗爵獻于尸尸拜受賓尸西北面荅拜爵止

鄭注尸止爵者以三獻禮成欲神惠之均于室中是以奠而待之

主婦洗于房中酌致于主人主人拜受主婦戶西北面拜送爵司宮設席

鄭注拜受乃設席變于士也

主婦薦韭菹醢坐設于席前菹在北方婦贊者執棗糗

以從主婦不興受設棗于菹北糗在東西佐食設俎臂

脊脅肺皆牢膚三魚一腊臂

鄭注臂左臂也特牲五體此三者以其牢與腊臂而

七牢腊俱臂亦所謂腊如牲體

主人左執爵右取菹換于醢祭于豆閒遂祭邊奠爵與

取牢肺坐絕祭齊之與加于俎坐挽手祭酒執爵以興

坐卒爵拜

鄭注無從者變于士也亦所謂順而撫也

主婦荅拜受爵酌以醋戶內北面拜

鄭注自酢不更爵殺

主人荅拜卒爵拜主人荅拜主婦以爵入于房戶作止

爵祭酒卒爵賓拜祝受爵尸荅拜

鄭注作止爵乃祭酒亦變于士自爵止至作止爵亦

異于賓

釋曰一止爵順上大夫賓尸之禮也特牲饋食禮再

止爵

祝酌授尸賓拜受爵尸拜送坐祭遂飲卒爵拜尸荅拜

獻祝及二佐食洗致爵于主人

鄭注洗致爵者以承佐食賤新之

主人席上拜受爵賓北面荅拜坐祭遂飲卒爵拜賓荅

拜受爵酌致爵于主婦主婦北堂司宮設席東面

鄭注北堂中房以北東面者變于士妻賓尸不變者

賓尸禮異矣內子東面則宗婦南面西上內賓自若

東面南上

釋曰特牲饋食禮主婦房中南面宗婦北堂東面北

上內賓西墉下東面南上宗婦與主婦易處宗婦統

于主婦今西上

主婦席北東面拜受爵賓西面荅拜

鄭注席北東面者北為下

婦贊者薦韭菹醢菹在南方婦人贊者執棗糗授婦贊

者婦贊者不與受設棗于菹南糗在棗東

鄭注婦人贊者宗婦之弟婦也今文曰婦也贊者執

主棗糗授婦贊者不與受

案今注疏本脫此十七字

佐食設俎于豆東羊臠豕折羊脊脅祭肺一膚一魚一

腊臠

鄭注豕折豕折骨也不言所折略之特牲主婦殺折

豕無脊脅下主人羊豕四體與腊臠而五

釋曰下文絕祭則離肺也曰祭主人以下肺或者因

而名之乎特牲禮其用以祭皆離肺

主婦升筵坐左執爵右取菹揆于醢祭之祭籩奠爵與

取肺坐絕祭臍之興加于俎坐挽手祭酒執爵興筵北

東面立卒爵拜

鄭注立飲拜既爵者變于大夫

賓荅拜賓受爵易爵于筐洗酌醋于主人戶西北面拜

主人荅拜卒爵拜主人荅拜賓以爵降奠于筐

鄭注自賓獻及二佐食至此亦異于儻

釋曰上篇賓長獻不及佐食此賓長獻節內有十爵

獻尸一主婦致爵于主人二主人酢主婦三尸酢賓

四賓獻祝五獻上佐食六下佐食七賓致爵于主人
 八于主婦九賓受主人酢十賓受主人酌十一賓受主人
 乃羞宰夫羞房中之羞司士羞庶羞于尸祝主人主婦
 內羞在右庶羞在左主人降拜衆賓洗獻衆賓其薦脰
 其位其酬醋皆如賓禮主人洗獻兄弟與內賓與私人
 皆如賓禮其位其薦脰皆如賓禮卒乃羞于賓兄弟內
 賓及私人辨

鄭注自乃羞至私人之薦脰此亦與賓同者在此篇
 不僨尸則祝猶侑耳卒已也乃羞者庶羞

釋曰僨尸之禮羞于侑不僨尸則羞于祝賓以下無
 內羞

賓長獻于尸尸醋獻祝致醋賓以爵降實于篚

鄭注致謂致爵于主人主婦不言如初者爵不止又
 不及佐食

賓兄弟交錯其酬無算爵

鄭注此亦與賓同者在此篇

釋曰特牲饋食禮堂下別尊旅酬無算爵兩有之下
 大夫不敢同君禮闕旅酬直為無算爵而已兄弟舉

解于其長亦當如賓禮在羞于私人之後賓長加獻之前文不具耳

利洗爵獻于尸尸醋獻祝祝受祭酒啐酒奠之

鄭注利獻不及主人殺也此亦異于賓

釋曰上篇此篇皆無佐食獻

主人出立于阼階上西面祝出立于西階上東面祝告于主人曰利成祝入主人降立于阼階東西面尸謏祝前尸從遂出于席門祝反復位于室中祝命佐食徹尸俎佐食乃出尸俎于席門外有司受歸之徹阼薦俎

鄭注自主人出至此與賓雜者也先養徹主人薦俎者變于士特牲饋食禮曰徹阼俎豆邊設于東序下乃養如賓

鄭注謂上篇自司宮設對席至上餽與出也古文養作餽

卒養有司官徹饋饌于室中西北隅南面如饋之設右几屏用席

鄭注官徹饋者司馬司士舉俎宰夫取敦及豆此于尸謏改饌當室之白孝子不知神之所在庶其饗之

于此所以為厭飫不令婦人收徹饌敦豆變于始也
尚使官也佐食不舉羊豕俎親餽尊也匪隱也古文
右作侑匪作莩

釋曰主婦獻祝宰夫薦宰夫多主主婦之事故敦豆
宰夫徹之特牲饋食禮佐食徹尸薦俎敦

納一尊于室中

鄭注陽厭殺無玄酒

司宮埽祭

鄭注埽豆閒之祭舊說云埋之西階東

釋曰神位在西故埋近西階也曾子問凡幣帛皮圭
為主命埋之階閒

主人出立于阼階上西面祝執其俎以出立于西階上
東面司宮闔牖戶

鄭注閉牖與戶為鬼神或者欲幽闇

祝告利成乃執俎以出于席門外有司受歸之眾賓出
主人拜送于席門外乃反

鄭注拜送賓者

案賓下今注疏本有也字

亦拜送其長不言長賓

者下大夫無尊賓也

婦人乃徹

鄭注徹祝之薦及房中薦俎不使有司者下上大夫

主之禮

徹室中之饌

鄭注有司饌之婦人徹之外內相兼禮殺

儀禮集釋卷三十

儀禮釋宮

武英殿聚珍版

提要

臣等謹案儀禮釋宮一卷宋李如圭撰如圭既為儀禮集釋以發明經義羽翼鄭康成注又為是書以攷論古人宮室之制體例仿爾雅釋宮逐條之下引經記注疏詳加討論如大夫士東房西室之說雖仍舊注而據聘禮賓館于大夫士證其亦有右房據鄉飲酒及少牢饋食證大夫士亦有左房東房之稱與天子諸侯言左對右言東對西者同

其攷證明哲深得經意發先儒之所未發大抵類此非以空言說禮者比也攷朱子大全集亦載此文與此大略相同惟無序引宋中興藝文志稱朱子嘗與之校定禮書疑朱子固嘗錄如圭是篇而集朱子之文者遂疑爲朱子所撰取以入集猶蘇軾書劉禹錫語題姜秀才課冊遂誤編入軾集耳觀朱子儀禮經傳通解于鄉飲酒禮薦出自左房聘禮負右房皆但存賈疏與是篇所言不同是亦不出朱子之一證也古者宮室各有定制歷代屢

變漸非其舊如序楹楣阿箱夾牖戶當榮當碑之屬讀儀禮者倘不能備知其處則于陳設之地進退之位俱不能知其或以後世之規模臆測先王之度數殊失其真是篇之作誠治儀禮者之圭臬也宋陳汶嘗序集釋刻之桂林郡學舍兼刻是篇今刻本不傳惟永樂大典內全錄其文別爲一卷題云李如圭儀禮釋宮蓋其所據猶爲宋本其間字句與朱子集中所載多增省不同處似彼爲初藁此爲定本今悉從永樂大典錄存以復如圭之

舊焉乾隆四十二年三月恭校上

總纂官侍讀學士臣陸錫熊

侍講學士臣紀昀

纂修官庶吉士臣戴震

儀禮釋宮

宋李如圭撰

周之禮文盛矣今僅見于儀禮然去古既遠禮經殘闕讀禮者苟不先明乎宮室之制則無以攷其登降之節進退之序雖欲追想其盛而以其身揖讓周旋乎其間且不可得況欲求之義乎于是本之于經稽之于注釋取宮室名制之可攷者彙而次之曰釋宮宮室之名制不盡見于經其可攷者宮必南鄉廟在寢東寢廟皆有堂有門其外有大門

案朱子大全集廟在寢東下無寢廟二字

周禮建國之神位右社稷左宗廟宮南鄉而廟居左則廟在寢東也寢廟之大門一曰外門其北蓋直寢故士喪禮注以寢門為內門中門凡既入外門其向廟也皆曲而東行又曲而北按士冠禮賓立于外門之外主人迎賓入每曲揖至于廟門儀禮廟皆注作席下同注曰入外門將東曲揖直廟將北曲又揖是也○又按聘禮公迎賓于大門內每門每曲揖及廟門賈氏曰諸侯五廟太祖之廟居中二昭居東二穆居西每廟之前兩旁有隅牆牆皆有閣門諸侯受聘于太祖廟

太祖廟以西隔牆有三入大門東行至太祖廟凡經三閣門故曰每門也大夫三廟其牆與門亦然故賓問卿大夫迎賓入亦每門每曲揖乃及廟門其說當攷○大夫士之門惟外門內門而已諸侯則三天子則五庠序則惟有一門鄉飲酒射禮主人迎賓于門外入門即三揖至階是也

堂之屋南北五架中脊之架曰棟次棟之架曰楣

鄉射禮記曰序則物當棟堂則物當楣注曰是制五架之屋也正中曰棟次曰楣前曰殿賈氏曰中脊為

棟棟南兩架北亦兩架

案朱子大全集無棟南以下八字

棟前一架

為楹楹前接簷為殿今見于經者惟棟與楹而已○

棟一名阿按士昏禮賓升當阿致命注曰阿棟也又

曰入堂深示親親賈氏曰凡賓升皆當楹此深入當

棟故云入堂深也○又按聘禮諸侯受聘于廟賓升

亦當楹賈氏曰凡堂皆五架則五架之屋通乎上下

而其廣狹隆殺則異耳

後楹以北為室與房

後楹之下以南為堂以北為室與房房東而室西相

連為之按少牢饋食禮主人室中獻祝祝拜于席上

坐受注曰室中迫狹賈氏曰棟南兩架北亦兩架于

棟北楹下為室南壁而開戶以楹後兩架之間為室

故云迫狹也昏禮賓當阿致命鄭云入堂深明不入

室是棟北乃有室也惟州序之制則無室按鄉射禮

記曰序則物當棟堂則物當楹注曰序無室可以深

也又禮席賓南面注曰不言于戶牖之間者此射于

序賈氏曰無室則無戶牖故也此序之異于餘宮也

案朱子大全集無此句

釋宮曰無室曰榭榭即序也

人君左右房大夫士東房西室而已

聘禮記若君不見使大夫受聘升受負右房而立大

射儀薦脯醢由左房是人君之房有左右也公食大

夫禮記筵出自東房注曰天子諸侯左右房賈氏曰

言左對右言東對西大夫士惟東房西室故直云房

而已然按聘禮賓館于大夫士君使卿還玉于館也

賓亦退負右房則大夫士亦有右房矣又鄉飲酒禮

記薦出自左房少牢饋食禮主婦薦自東房亦有左

房東房之稱當攷

案賈氏以言左對右言東對西為人君有左右房之證李氏援聘禮

之右房鄉射禮記之左房少牢饋食之東房疑大夫

士亦有右房亦有左房東房之稱實足以訂正舊說

之誤又鄉射記邊豆出自東房特牲饋食禮賓與長

兄弟之薦自東房有司徹宰夫自東房薦脯醢是大

夫士言東對西者固不一賈公彥以聘禮賓禮為正

客館非大夫之廟閣若據尚書古文疏證引其說辨

之曰下文公館賓賓辟康成注凡君有事于諸臣之

家車造廟門乃下賈疏云以其卿館于大夫之廟已

不能揜前說之非且古者天子適諸侯必舍其祖廟

卿館于大夫館于士士館于工商皆廟也無別所為館舍惟侯氏觀天子賜以舍非廟聘禮安得與之同聘禮一篇自卿致館賓即館後有司入陳注云入賓所館之廟揖入及廟門注云舍于大夫廟卿館于大夫注云館者必于廟不得從公彥曲說江永鄉黨圖攷曰天子至士堂房室之制有廣狹隆殺堂後為房室左右房以夾室使室居中其制度當同如大夫士東房西室恐不成制度堂上設席行禮當戶牖之間賓席不得當東西之中偏于西北一隅非所以

尊賓大夫僎尸尸席不當堂之中亦非所以尊尸皆因鄉飲酒義言設尊賓主共之及拘于四面之坐以辭害意故先備有此說耳

室中西南隅謂之奧

邢昺曰室戶不當中而近東西南隅最為深隱故謂之奧而祭祀及尊者常處焉

東南隅謂之窔

郭氏曰窔亦隱闇

東北隅謂之宦

郭氏曰宦見禮案爾雅云室東北隅謂之宦此云宦見禮有誤

西北隅謂之屋漏

詩所謂尚不愧于屋漏是也曾子問謂之當室之白

案此下朱子大全集有孫炎曰當室日光所漏入也十一字鄭謂當室之白西北

隅得戶明者經止曰西北隅

室南其戶戶東而牖西

說文曰戶半門也牖穿壁以木為交牕也月令正義

曰古者窟居開其上取明雨因霑之是以後人名室

為中霑開牖者象中霑之取明也○牖一名鄉其扇

在內按士虞禮祝闔牖戶如食間啓戶啓牖鄉注曰

牖先闔後啓扇在內也鄉牖一名是也

戶牖之間謂之依案爾雅作展古通用

郭氏曰牖東戶西也觀禮斧依亦以設之于此而得
依名○士昏禮注曰戶西者尊處以尊者及賓客位
于此故又曰客位

戶東曰房戶之間曰西北

士冠禮注曰房戶間者房西室戶東也寢廟以室為
主故室戶專得戶名凡言戶者皆室戶若房戶則兼
西言房以別之○大夫士房戶之間于堂為東西之中

當兩楹間按詩正義曰鄉飲酒義云尊于房戶之間
賓主共之由無西房故以房與室戶之間為中也又
鄉飲酒禮席賓于戶牖間而義曰坐賓于西北則大
夫士之戶牖間在西而房戶間為正中明矣人君之
制經無明證按釋宮曰兩階間謂之鄉郭氏曰人君
南鄉當階間則人君之室正中其西為右房而戶牖
間設依處正中矣月令正義曰崔氏云宮室之制中

央為正室正室左右為房蓋謂人君制也案朱子大

令以下二全集無月又按詩斯干曰築室百堵西南其戶箋曰

天子之寢左右房異于一房者之室戶也正義曰大

夫惟有一東房故室戶偏東與房相近天子諸侯既

有右房則室當在其中其戶正中比一房者之室戶

為西當放案江永鄉黨圖攷曰大夫士之制亦當有

左右房鄉飲于庠亦如其制設尊于房戶

之間而賓席在尊西主人在阼階上為近東即

是賓主共之不必謂在東西之中然後為共也主人在阼

介在西階上為東西俱在尊東為東北賓在戶牖間

以阼階上視之即為西北不必謂在西北隅然後為

西北也其實賓席宜在中南鄉衆賓席以次繼而西

儀者鄉之卿大夫來觀禮有無不定本無四面之坐

象四時之說倘無觀禮之儀豈四方缺一方四時缺

一時乎作義者以臆說禮泥其文遂有大夫士東房

猶南東其畝或南其畝或東其畝也蓋此詩言作燕

房戶之西曰房外

士昏禮記母南面于房外女出于母左士冠禮尊于

房戶之間若庶子則冠于房外南面注曰謂尊東也

是房戶之西得房外之名也○房戶之東其南當阼

階見賈氏釋士冠禮案此條朱子大全集作房之戶

于房南壁亦當近東士昏禮注

曰北堂在房中半以北南北直室東隅東西直房戶

與隅間隅間者蓋房東西之中兩隅間也房中之東

案言房南壁之東偏幾疑在序外直夾矣若云房戶在序內之壁近東偏則可耳

房中半以北曰北堂有北階

士昏禮記婦洗在北堂直室東隅注曰北堂房中半以北賈氏曰房與室相連為之房無北壁故得北堂之名按特牲饋食禮記尊兩壺于房中西牖下南上內賓立于其北東面南上宗婦北堂北上宗婦在內賓之北案朱子大全集訛作內賓在宗婦之北乃云北堂又婦洗在北堂而直室東隅是房中半以北為北堂也○婦洗在北堂而士虞禮主婦洗足爵于房中則北堂亦通名

房中矣○大射儀工人士與梓人升下自北階注曰位在北堂下則北階者北堂之階也

堂之上東西有楹

楹柱也古之築室者以垣墉為基而屋其上惟堂上有兩楹而已楹之設蓋于前楣之下按鄉射禮曰射自楹間注曰謂射于庠也又曰序則物當棟堂則物當楣物者畫地為物射時所立處也堂謂庠之堂也又曰豫則鉤楹內堂則由楹外當物北面揖豫即序也鉤楹繞楹也物當棟而升射者必鉤楹內乃北面

就物則棟在楹之內矣物當楣而升射者由楹外北面就物又鄭氏以為物在楹間則楹在楣之下也○

又按釋宮曰梁上楹謂之稅稅侏儒柱也梁楣也爾案

雅宋廡謂之梁其上楹謂之稅又曰楣謂之梁宋廡乃左右縱者楣乃前後橫者雖同有梁之名而縱橫異侏儒柱在宋廡上以承棟不得在楣此引爾雅釋宮失其實侏儒柱在梁之上則

楹在楣之下又可知矣

堂東西之中曰兩楹間

公食大夫禮致豆實陳于楹外簠簋陳于楹內兩楹間言楹內外矣又言兩楹間知凡言兩楹間者不必

與楹相當謂堂東西之中耳

南北之中曰中堂

聘禮受玉于中堂與東楹之間注曰中堂南北之中也入堂深尊賓事也賈氏曰後楣以南為堂堂凡四架前楣與棟之間為堂南北之中公當楣拜訖更前北侵半架受玉故曰入堂深也按東楹之間侵近東楹非堂東西之中而曰中堂則中堂為南北之中明矣○又按士喪禮注曰中以南謂之堂賈氏曰堂上行事非專一所若近戶即言戶東戶西近房即言房

外之東房外之西近楹卽言東楹西楹近序卽言東序西序近階卽言東階西階其堂半以南無所繼屬者卽以堂言之祝漸米于堂是也

堂之東西牆謂之序

郭氏曰所以序別內外

序之外爲夾室

公食大夫禮大夫立于東夾南注曰東于堂賈氏曰序以西爲正堂序東有夾室今立于堂下當東夾是東于堂也○又按公食禮宰東夾北西面賈氏曰位

在北堂之南與夾室相當特牲饋食禮豆籩鉶在東房注曰東房房中之東當夾北則東夾之北通爲房中矣室中之西與右房之制無明文東夾之北爲房中則西夾之北蓋通爲室中其有兩房者則西夾之北通爲右房也歟

夾室之前曰廂

案儀禮作箱古通用

亦曰東堂西堂

西堂者西堂

覲禮記注曰東廂東夾之前相翔待事之處特牲饋食禮注曰東堂西堂東西夾之前近南耳賈氏曰西堂卽西廂也釋宮曰室有東西廂曰廟郭氏曰夾室

前堂是東廂亦曰東堂西廂亦曰西堂也○釋宮又曰無東西廂有室曰寢按書顧命路寢有西夾士喪禮死于適寢主人降襲經于序東注曰序東東夾前則正寢亦有夾與廂矣釋宮所謂無東西廂者或者謂廟之寢也與○凡無夾室者則序以外通謂之東堂西堂按鄉射禮射于庠序而主人之弓矢在東序東大射儀射于射宮而君之弓矢適東堂大射之東堂卽鄉射之東序東以其無夾與廂故東序東直謂之東堂也○此東西堂堂各有階按雜記夫人奔喪

升自側階注曰側階旁階奔喪曰婦人奔喪升自東階注曰東階東面階也賈氏釋燕禮曰東面階西面階婦人之升東面階者蓋東堂之階其西堂則有西面階也

東堂下西堂下曰堂東堂西

大射儀賓之弓矢止于西堂下其將射也賓降取弓矢于堂西堂西卽西堂下也特牲饋食禮主婦視饔爨于西堂下記曰饔爨在西壁則自西壁以東皆謂之西堂下矣○又按大射儀執冪者升自西階注曰

羞膳者從而東由堂東升自北階立于房中則東堂下可以達北堂也

堂角有坫

士冠禮注曰坫在堂角賈氏釋士喪禮曰堂隅有坫

以土為之

案江永鄉黨圖攷曰堂之四隅即為坫非別有土為之也反坫以反爵崇坫以康圭

乃是燒土為之或謂堂隅為坫也

堂之側邊曰堂廉

按鄉飲酒禮設席于堂廉注曰側邊曰廉喪大記正義曰堂廉堂基南畔廉稜之上也又按鄉射禮衆弓

倚于堂西矢在其上注曰上堂西廉則堂之四周皆有廉也

升堂兩階其東階曰阼階

士冠禮注曰阼猶酢也東階所以答酢賓客也○每階有東西兩廉聘禮饗鼎設于西階前當內廉此則西階之東廉以其近堂之中故曰內廉也○士之階三等按士冠禮降三等受爵弁注曰下至地賈氏曰匠人云天子之堂九尺賈馬以為階九等諸侯堂宜七尺階七等大夫宜五尺階五等士宜三尺故階三

等也○兩階各在楹之外而近序按鄉射禮升階者
 升自西階繞楹而東燕禮勝爵者二人升自西階序
 進東楹之西酌散交于楹北注曰楹北西楹之北則
 西階在西楹之西矣士冠禮冠于東序之筵而記曰
 冠于阼喪禮攢置于西序而檀弓曰周人殯于西階
 之上故知階近序也

堂下至門謂之庭三分庭一在北設碑

聘禮注曰宮必有碑所以識日景知陰陽也賈氏釋
 士昏禮曰碑在堂下三分庭一在北按聘禮歸饗餼

醯醢夾碑米設于中庭注曰庭實固當中庭言中庭
 者南北之中也列當醯醢南列米在醯醢南而當庭
 南北之中則三分庭一在北設碑可見矣○聘禮注
 又曰設碑近如堂深堂深謂從堂廉北至房室之壁
 也三分庭一在北設碑而碑如堂深則庭蓋三堂之
 深也○又按鄉射之侯去堂三十丈大射之侯去堂
 五十四丈則庭之深可見而君大夫宮室隆殺之度
 亦從可推矣

堂塗謂之陳

郭氏曰堂下至門徑也其北屬階其南接門內霤按凡入門之後皆三揖至階皆禮注曰三揖者至內霤將曲揖既曲北面揖當碑揖賈氏曰至內霤將曲者至門內霤主人將東賓將西賓主相背時也既曲北面者賓主各至堂塗北行向堂時也至內霤而東西行趨堂塗則堂塗接于霤矣既至堂塗北面至階而不復有曲則堂塗直階矣○又按聘禮饗鼎設于西階前陪鼎當內廉注曰當階內廉辟堂塗也西階之東廉為內廉陪鼎在饗鼎之後設之當西階內廉以

辟堂塗案朱子大全集無當階內廉四字及西階之東以下二十六字則堂塗在階

廉之內矣案此句有訛舛既云當西階內廉以辟堂塗則堂塗正直階當云則階內廉在堂塗之內矣朱子大全集與此同誤○鄉飲酒禮注三揖又曰將進揖當

陳揖當碑揖陳即堂塗也

中間屋為門門之中有闔案中間屋之間朱子大全集誤刻門

士冠禮曰席于門中闔西闔外注曰闔櫛也玉藻正

義曰闔門之中央所豎短木也釋宮曰櫛在地者謂

之臬郭氏曰即門櫛也然則闔者門中所豎短木在

地者也其東曰闔東其西曰闔西

門限謂之闕

釋宮曰柎謂之闕郭氏曰闕門限邢昺曰謂門下橫木為內外之限也○其門之兩旁木則謂之棖棖闌之間則謂之中門見禮記

闔謂之扉

邢昺曰闔門扇也其東扉曰左扉○門之廣狹按士昏禮曰納徵儷皮記曰執皮左首隨入注曰為門中阨狹賈氏曰皮皆橫執之門中阨狹故隨入也匠人云廟門容大扇七个大扇牛鼎之扇長三尺七个大

丈一尺彼天子廟門此士之廟門降殺甚小故云阨狹也推此則自士以上宮室之制雖同而其廣狹則異矣

夾門之堂謂之塾

釋宮曰門側之堂謂之塾郭氏曰夾門堂也門之內外其東西皆有塾一門而塾四其外塾南鄉按士虞禮陳鼎在門外之右匕俎在西塾之西注曰塾有西者是室南鄉又按士冠禮擯者負東塾注曰東塾門內東堂負之北面則內塾北鄉也○又按月令祀竈

注曰席于門之奧正義曰神位在西席于門外西室之奧也門外之室有奧則門室之制蓋亦如堂之室

矣案朱子大全集無此四十七字○凡門之內兩塾之間謂之宁按

聘禮賓問卿大夫迎于外門外及廟門大夫揖入擯

者請命賓入三揖竝行注曰大夫揖入者省內事也

既而俟于宁也凡至門內雷為三揖之始上言揖入

下言三揖竝行則俟于雷南門內兩塾間可知矣李

巡曰宁正門內兩塾間義與鄭同謂之宁者以人君

門外有正朝視朝則于此宁立故耳○周人門與堂

脩廣之數不著于經按匠人云夏后氏世室堂脩二

七廣四脩一堂脩謂堂南北之深其廣則益以四分

脩之一也門堂三之二室三之一者門堂通謂門與

塾其廣與脩取數于堂得其三之二室三之一者兩

室與門各居一分也此夏后氏之制周人門堂之制

蓋亦如此云

門之內外東方曰門東西方曰門西

特牲饋食禮注曰凡鄉內以入為左右鄉外以出為

左右士冠禮注又曰出以東為左入以東為右以入

為左右則門西為左門東為右鄉飲酒禮賓入門左
 燕禮卿大夫皆入門右是也以出為左右則門東為
 左門西為右士冠禮主人迎賓出門左西面士虞禮
 側享于廟門外之右是也闈東曰闈右亦自入者言
 之也○天子諸侯門外之制其見于經者天子有屏
 諸侯有朝按觀禮侯氏入門右告聽事出自屏南適
 門西注曰天子外屏釋宮曰屏謂之樹郭氏曰小牆
 當門中曲禮正義曰天子外屏屏在路門之外諸侯
 內屏屏在路門之內此侯氏出門而隱于屏則天子

外屏明矣釋宮又曰門屏之間謂之宁謂宁在門之

內屏之外此屏據諸侯內屏而言也

案原本脫之間至此屏凡十六

字據朱子大全集補

諸侯路寢門外則有正朝大門外則有外

朝按聘禮夕幣于寢門外宰入告具于君君朝服出
 門左南鄉注曰寢門外朝也入告入路門而告賈氏
 曰此路門外正朝之處也是正朝在寢門外也聘禮
 又曰賓死介復命柩止于門外若介死惟上介造于
 朝注曰門外大門外也必以柩造朝達其忠心又賓
 拜饗餼于朝注曰拜于大門外賈氏曰大門外諸侯

之外朝也賓拜于朝無入門之文則諸侯外朝在大門外明矣是外朝在大門外也諸侯三朝其燕朝在寢燕禮是也正朝與外朝之制度不見于經蓋不可得而攷矣

寢之後有下室

士喪禮記士處適寢又曰朔月若薦新則不饋于下室注曰如今之內堂正寢聽朝事賈氏曰下室燕寢也然則士之下室于天子諸侯則爲小寢也春秋傳曰子太叔之廟在道南其寢在廟北其寢廟之寢也

廟寢在廟之北則下室在適寢之後可知矣○又按喪服傳曰有東宮有西宮有南宮有北宮異宮而同財內則曰由命士以上父子皆異宮賈氏釋士昏禮曰異宮者別有寢若不命之士父子雖大院同居其中亦隔別各有門戶則宮之中又有異宮也自門以北皆周以牆

聘禮釋幣于行注曰喪禮有毀宗躐行出于大門則行神之位在廟門外西方檀弓正義曰毀宗躐行毀西邊牆以出柩也士喪禮爲塋于西牆下注曰西牆

中庭之西特牲饋食禮主婦視簠饗于西堂下記曰
簠饗在西壁注曰堂之西牆下按門之西有牆則牆
屬于門矣西牆在中庭之西則牆周乎庭矣西壁在
西堂下則牆周乎堂矣○牆者墉壁之總名室中謂
之墉昏禮尊于室中北墉下是也房與夾亦謂之墉
冠禮陳服于房中西墉下聘禮西夾六豆設于西墉
下是也堂上謂之序室房與夾謂之墉堂下謂之壁
謂之牆其實一也隨所在而異其名耳○堂下之壁
闈門在焉按士冠禮冠者降適東壁見于母注曰適

東壁者出闈門也時母在闈門之外婦人入廟由闈
門士虞禮賓出主人送主婦亦拜賓注曰女賓也不
言出不言送拜之于闈門之內闈門如今之東西掖
門釋宮曰宮中之門謂之闈郭氏曰謂相通小門也
是正門之外又有闈門而在旁壁也

人君之堂屋爲四注大夫士則南北兩下而已

士冠禮設洗直于東榮注曰榮屋翼也周制自卿大
夫以下其室爲夏屋燕禮設洗當東霤注曰人君爲
殿屋也按攷工記殷人四阿重屋注曰四阿若今之

四注屋殷人始爲四注屋則夏后氏之屋南北兩下而已周制天子諸侯得爲殿屋四注卿大夫以下但爲夏屋兩下四注則南北東西皆有霤兩下則惟南北有霤東西有榮是以燕禮言東霤而大夫士禮則言東榮也霤者說文曰屋水流也徐鍇曰屋檐滴處榮者說文曰屋栳之兩頭起者爲榮又曰栳齊謂之檐楚謂之栳郭璞注上林賦曰南榮屋南檐也義與說文同然則檐之東西兩頭起者曰榮謂之榮者爲屋之榮飾謂之屋翼者言檐角之軒張如翬斯飛耳

士喪禮升自前東榮喪大記降自西北榮是屋有四榮也○門之屋雖人君亦兩下爲之燕禮之門內霤則門屋之北霤也○凡屋之檐亦謂之宇按士喪禮爲銘置于宇西階上注曰宇栳也說文曰宇屋邊也釋宮曰檐謂之栳郭氏曰屋栳邢昺曰屋檐一名栳一名栳又名字皆屋之四垂也宇西階上者西階之北上也當宇也階之上當宇則堂廉與坳亦當宇矣特牲饋食主婦視餼爨于西堂下注曰南齊于坳其記又注曰南北直屋栳是也階上當宇故階當霤鄉射

禮記磬階間縮霤是也縮從也霤以東西爲從故曰縮霤此霤謂堂之南霤也

此其著于經而可攷者也

禮經雖亡缺然于覲見天子之禮于燕射聘食見諸侯之禮餘篇見大夫士之禮宮室之名制不見其有異特其廣狹隆殺不可攷耳按書顧命成王崩于路寢其陳位也有設斧依牖間南鄉則戶牖間也西序東嚮東序西嚮則東西序也西夾南嚮則夾室也東房西房則左右房也賓階面阼階面則兩階前也左

塾之前右塾之前則門內之塾也畢門之內則路寢門也兩階阼則堂廉也東堂西堂則東西廂也東垂西垂則東西堂之宇階上也側階則北階也又曰諸侯出廟門俟則與士喪禮殯宮曰廟合也然則鄭氏謂天子廟及路寢如明堂制者蓋未必然明堂位與攷工記所記明堂之制度者非出于舊典亦未敢必信也○又按書多士傳曰天子之堂廣九雉三分其廣以二爲內五分內以一爲高東房西房北堂各三雉公侯七雉三分廣以二爲內五分內以一爲高東

房西房北堂各二雉伯子男五雉三分廣以二為內
 五分內以一為高東房西房北堂各一雉士三雉三
 分廣以二為內五分內以一為高有室無房堂注曰
 廣榮間相去也雉長三丈內堂東西序之內也高穹
 高也此傳說房堂及室與經亦不合然必有所自姑
 存之以備參攷

儀禮釋宮



